

Ն Ե Ի Ո Յ



ՏԱՆԵԼԱՎՈՐՈՒՄ

ԵՆ

Ե Ր Ո

Dr. Carlo Inasaridse

Յ Ե Կ Ո Ց Ո
1939

Dr. Carlo Inasaridse

26806



სახელმწიფო

მე

ე რ ი

306080
1939

ახტორისაგან

ჩვენ ვცხოვრობთ ისეთ ეპოქაში, როცა ცნება სახელმწიფო, ერი საერთო ყურადღების ცენტრშია მოქცეული, ერთგვარ მისტიურ ძალასაც კი აწერენ მათ, რომელიც მოწოდებულია იხსნას კაცობრიობა და მისი ცივილიზაცია დაშლა-განადგურებისაგან.

მართლაც, დაშლისა და განადგურების მიზეზები ბევრია თვითნებულ სახელმწიფოსა და ერის ცხოვრებაში, ისე როგორც მათი ურთიერთ განწყობილებაში, და ისინი პოზიერ ნიადაგს პოულობენ კლასთა და ერთა შეურიგებელ დაპირდაპირებაში შიგნით და გარეთ.

მსოფლიოს ეკონომიური კრიზისი, დიდ ომსა და ზავს, რევოლუციებსა და სამი იმპერიის დამხობას რომ მოჰყვა, თუმცა მარტო მათგან როდი იყო იგი გამოწვეული, დღის წეს-რიგში სვამს, ერთის მხრით, კაპიტალისტური წყობილების ყოფნა არ ყოფნის კითხვას, მეორეს მხრით, დედა-მიწის და მის ბუნებრივ სიმდიდრეთა, პირველ რიგში, ნედლ მასალათა რაციონალურად განაწილების კითხვას.

არასდროს ქვეყნები ისე მჭიდროდ არ ყოფილან ერთი მეორისაგან დამოკიდებული და იმავე დროს ისე გათიშული, როგორც დღეს! ომი, ომები, მაშასადამე, მთელი მათი უსაშინელესი ტექნიკური პოტენციალით, თითქო გარდაუვალი, თვით განგებისაგან ნაბრძანები ხდება. იგი უკვე მძვი-



ნვარებს აზიისა და ევროპის, წყნარ და ატლანტიკის ოკეანე-
თა ორ განაპირა კუთხეში, ასე ვსთქვათ, არა-ლეგალურად,
ფორმალურად გამოუცხადებლად. არასდროს, ახალ ხანაში,
საერთაშორისო უფლება ასე არ ყოფილა ფეხით გათელილი.
ოცი წლის ჰაპან - წყვეტა ერთა ლიგისა მის გასამარჯვებლად
ფუჭი გამოდგა.

ბრალი დიდ სახელმწიფოებს ედება, მათ შეუთანხმებლო-
ბას, ქიშპობას. უბრუნდებიან ძველი წონასწორობის სისტემას,
სამხედრო კავშირებს. შიშველ ძალთა განწყობილება სწავეტს
ყველაფერს, აქედან ინტენსიური შეიარაღებაც, რომელიც
მთელი ავლა - დიდების დიდ ნაწილსა ნთქავს თვითუღ
სახელმწიფში.

მძიმე და სახიფათო გამხდარა პატარა სახელმწიფოთა მდგო-
მარეობა, მათი თავისუფლება და დამოუკიდებლობა თითქო
ქვიშაზედ დაწერილი გამოდგა! როგორც საშუალო საუკუნო-
ებში, ისინი „ვასალებად“ ქცეულან, ან კიდევ ლამობენ ასე-
თებად იქცენ. „დიდები“ სწავეტენ, „პატარანი“ ემორჩილე-
ბიან. უფლება და სამართლიანობა ენუქას ანდერძი გამოდგა.

და ამ მკაცრ, უღმობელ ვითარებაში, როცა სახელმწი-
ფოსა და ერის არსებობა პრობლემატური გამხდარა, შინაუ-
რი უთანხმოება, კლასთა და პარტიათა შეხეთქება თან და თან
ნელდება და ადგილს უთმობს მათ დაახლოებას, ურთიერთ
დათმობას და გაერთიანებული ძალით ქვეყნის დაცვას გარეშე
ხიფათისაგან. სიმძიმის ცენტრი გადადის საგარეო საქმეებზე,
ვინაიდან საშინაო საქმეები, თვით რეჟიმიც მათზეა, პირველ
რიგში, დამოკიდებული.

მაშასადამე, საერთო სამშობლოსათვის ზრუნვა, მისი გან-
მტკიცება შიგნით და გარეთ, გაძლიერება ფიზიკურად და მო-
რალურად, გასალკლდევება — აი სადღეისო ამოცანა, რომ-



ლის გადაჭრას თვითეულისა და ყველასი უკეთესი **ძალები** უნდა შეეწიროს.

ეს ამოცანა, თავის თავად მისახვედრია, გაცილებით უარეს პირობებში ისმის ჩაგრული ერებისათვის. მათ არ გააჩნიათ სახელმწიფო, არც მისი ორგანოები, ხელ-ფეხ შეკრულნი—მათი სულის ჩაკვლას ლამობს მტერი, მჩაგვრელი ერი.

მაგრამ მით უფრო თავგანწირულია მათი ბრძოლა თვით-არსებობისათვის. ხოლო თვითარსებობა თვითსახელმწიფოებრივობას ნიშნავს: ერი უნდა იქცეს სახელმწიფოდ, თუ უნდა არ გადაგვარდეს, თუ უნდა იცოცხლოს და თავისი ისტორიული მისია შეასრულოს.

ჩემი წიგნაკის დანიშნულება ამ დებულების დასაბუთება არის.

ქართველ ერს ჰქონდა თავისი სახელმწიფო, მაგრამ ვერ შეინარჩუნა იგი. ეხლა ის ისევ ლამობს მის აღდგენას და პერსპექტივებიც საიმედო იწლება ამისათვის...

ბევრია, რა თქმა უნდა, დამოკიდებული გარეშე პირობებისაგან, მაგრამ უპირველესი პირობა მაინც შინაგანი მთლიანობა არის, ერთმანეთის გატანა, დანდობა; მთელი ერის და მისი შვილთა ერთარსებად, მონოლიტად ქცევა. განზე ხტომა, მთიშობა, შეურიგებლობა ამ საბედისწერო ეპოს შეცდომა კი არ არის, არც უპასუხისმგებლობა, არამედ **დანაშაული**.

პარიზი. 19 დეკემბერი 1938 წ.

I

ს ა ხ ე ლ მ წ ი ფ ო

ხელისუფლება

სპეციალისტთა განსაზღვრით სახელმწიფო სამპიროვან ფენომენს წარმოადგენს: ტერიტორია, მოსახლეობა, ხელისუფლება. პირველი ორი—ტერიტორია და მოსახლეობა—დასაბამიდან მოცემულია, მზამზარეული, დამოუკიდებლად ჩვენი ნებისა და სურვილისა. ხოლო მესამე — ხელისუფლება — ადამიანის მიერ არის შექმნილი, მისი შემოქმედების ნაყოფია. ამიტომ, თუ პირველი ორი ობიექტიურ სინამდვილეს აღბეჭდავს და შედარებით ადვილი შესასწავლია, მესამეში სჭარბობს სუბიექტიური ელემენტი და მისი შესწავლაც უფრო გაძნელებულია.

მაგრამ ეს ელემენტია სწორედ, რომელიც ჰქმნის სახელმწიფოს, შთაბერავს მას სულს, სიცოცხლეს ანიჭებს. მეტი არ იქნება დავაკვირდეთ თვით სახელწოდებას: სახელმწიფო გულისხმობს ისეთ ქვეყანას, ხალხს, რომელშიც ხელმწიფება, ხელისუფლება სუფევს. ხელ-მწიფება, ხელის-უფლება—რას ნიშნავს ეს? ხელი ძველადანვე ძალის გამომხატველია, მისი სიმბოლო. ხელისუფლებას გერმანელნი პირდაპირ ძალას უწოდებენ: Macht. იყო უთუოდ ხანა, როცა ჩვენშიც მართო ხელს ხმა-



რობდენ ძალის გამოსახატველად. მეორე ნახევარი: „მწიფება“, სახელდობრ „უფლება“ ალბათ უფრო გვიან შემოვიდა ხმარებაში.

პირველყოფილ ადამიანს აბა სად ექნებოდა უფლებაზე წარმოდგენა! თვით უფლებაც დასაწყისში უთუოდ ფლობას, უ-ფლობას ნიშნავდა. აქედან, უფალიც იმას დაერქვა პირველად, ვინც ფლობდა რამე საგანს. ხელის-უფლება შემდეგი განვითარების ნაყოფია და აჩვენებს ძალას ხელის გვერდით, როგორც განყენებულ რამეს, რომელსაც ერთი რომელიმე ადამიანი იკუთვნებს.

ღირსშესანიშნავია, რომ ჩვენს წინაპრებს ჰქონიათ წარმოდგენა არა მარტო ხელზე, ფიზიკურ ძალაზე, არამედ უფლებაზეც. ბისმარკი იტყოდა ხოლმე ძალა ჰქმნის უფლებასო და ეს მართალიცაა ისტორიულად. ხოლო ჩვენი წინაპრები თითქო ერთსა და იმავე ღირებულებას აძლევდენ ორთავეს, ამიტომ იტყოდენ: ძალა-უფლება. ჩვენს დროში უფლებას ანიჭებენ უპირატესობას: უფლება ჰქმნის ძალასო, მაგრამ ეს ხომ მისასწრაფავი მიზანია და არა სინამდვილე ჯერ - ჯერობით.

მით უფრო უძველეს, უხსოვარ დროში. მაშინ უთუოდ შიშველი ძალა, ხელი იყო პატივში. ვისაც უფრო ძლიერი მკლავი ჰქონდა, ის იყო უფალიც, მას ემორჩილებოდენ სუსტი მკლავის მქონენი. იარაღიც ხომ არ იყო ჯერ მოგონილი, ხოლო ის, რასაც ბუნება იძლეოდა მზამზარეულად: ქვა, კეტი, ამასაც მკლავით ძლიერი უკეთ იმარჯვებდა. საინტერესოა, რომ ჩვენი ხალხი სიტყვა იარაღს დღესაც ორმაგი — საომარი და სამუშაო — მნიშვნელობით ხმარობს.

ვინაა თავდაპირველად ხელის-უფალი, ძალის მატარებელი, პიროვნება თუ კოლექტივი? მე ვფიქრობ, პიროვნება, ხელიც ხომ მას აბია, კოლექტივს კი არა. პირველყოფილი ადამიანი მოკლებულია განყენებულ აზროვნებას. მაგრამ ის მაინც



კოლექტიურად ცხოვრობს, ჯგუფ-ჯგუფად, და ეს ზნე დაჰყვა მას კიდევ ცხოველური მდგომარეობიდან. ოჯახი, ყოველ შემთხვევაში, პირველი უჯრედია ადამიანთა ჯგუფური ცხოვრებისა, ის დიდია, შეიცავს მრავალ წყვილს ორთავე სქესისა. აქ მკლავის გარდა ხნოვანებაც ფასობს: ძალის მატარებელია ოჯახის მამა, უფროსი ხნოვანებით, მის ავტორიტეტს ცნობილობს დიდი და პატარა.

ოჯახის დამაარსებელი, რასაკვირველია, მკლავითაც ძლიერი უნდა ყოფილიყო, უამისოდ არ შეეძლო ჯერ კიდევ შიშველი ძალმომრეობის ხანაში ასეთი მისსია ეკისრნა. სხვა და სხვა ოჯახნი, გვარნი მუდმივ შუღლში არიან ურთიერთ შორის, ერთის მიერ მეორის დამორჩილება, თვით მოსპობაც საერთო წესია. თავდასხმა და თავდაცვა ერთმანეთს სცვლის გამუდმებით. გამარჯვებული დამარცხებულზე ავრცელებს თავის ძალს, ხელს.

ჩვენი მატრიანედან ცნობილი მამასახლისი სწორედ ასეთი ძალის, ხელის მატარებელია უფრო განიერ სივრცეზედ მრავალ გვაროვნებათა მიმართ. სახელი დარჩა ძველი და იმავე დროს ახალიც არის: მამა სახლისა ანუ ოჯახისა, ხოლო შინაარსით უფალი მთელი მხარისა. დიასახლისი დარჩა მხოლოდ დედა სახლისა ამ სიტყვის პირდაპირი მნიშვნელობით, მისი გავლენა სხვა ოჯახზე, გვარზე არ გადასულა, ყოველ შემთხვევაში, მემატრიანე სდუმს ამის შესახებ.

მაგრამ ეს არ გვიშლის ვიფიქროთ, როგორც ანტროპოლოგნი ამტკიცებენ, რომ პირველი ოჯახის დამაარსებელი შეიძლება დედა იყო და არა მამა: პატრიარქატის ადრე მატრიარქატი არსებობდაო. ნიკო მარი ამას ასაბუთებდა სიტყვების წყობით: დედ-მამა, ცოლ-ქმარი, და-ძმა.... ყველგან დედრობითი სქესი მამრობითის წინაა. მაგრამ, გარდა ლინგვისტიურისა, სხვა საბუთიც იყო ამისათვის: ქალი თავის აგებულებით, შვილოსნობით კერაზე იყო მიკრული, ხოლო კაცი გარეთ ატარებდა უმეტეს დროს, მაგ., ნადირობაში.



ქალზე უკვე არ შეიძლება ითქვას, რომ ის კაცზე უფრო ძლიერი იყო მკლავითაც, ამიტომ უპირატესობა უკანასკნელს რჩება ბოლოს და ბოლოს.

მამასახლისობას, თუ მატთანეს დავუჯერებთ, მეფობა მოჰყვა ჩვენში, აქაც პიროვნების და არა კოლექტივის ძალაზეა ლაპარაკი. სამეფო და სახელმწიფო ერთსა და იმავეს ნიშნავს, მაგრამ განსხვავებაც არის მათ შორის: პირველი უთუოდ მეფესაც გულისხმობს, მაშინ როდესაც მეორის მეთაური შეიძლება მეფე არ იყოს. აქედან სიტყვა სა-ხელ-მწიფო უფროა ხმარებაში. ქართულად კი ეს ბუნებრივიცაა, რადგან პირდაპირ გვიჩვენებს ძალის წყაროს-ხელს. სამაგიეროდ ახალ დაქორწინებულთ, ვინც არ უნდა იყვნენ, მეფე-დედოფალს ვეძახით! ამასაც თავისი აზრი აქვს, რადგან მიგვიითითებს ქმრის უპირატესობაზე შედარებით ცოლთან და ოჯახის დიდ მნიშვნელობაზე, როგორც თვით სამეფოს პროტოტიპზე.

მამასახლისი, უფრო გვიან მეფე, მხედარი იყო, მკლავით სხვებზე ძლიერი, მამასაღამე, შეიარაღებულ ბრბოს ბელადიც. შემდეგ ბელადი სარდლად იქცა, ბრბო ჯარად, და აქ კი უფრო მკაფიოდ ცხადდება ხელისუფლების პიროვნული თვისება, რადგან სამხედრო საქმე თავისივე ბუნებით ერთ მეთაურს, სარდალს მოითხოვს. რამდენად მჭიდროა ისტორიულად მეფისა და სარდლის ერთ პიროვნებაში შეტყუება, ეს იქიდანაც სჩანს, რომ ევროპის მეფენი დღესაც „მუზარად-ჩაფხუტებში“ გვევლინებიან, თუმცა ზოგს თოფის-წამლის სუნიც არ სცემია!

მეფისა და სარდლის ხელობის ერთმანეთისაგან დაშორება ახალ ხანაში მოხდა. ახალი ხანის მოვლენაა ისიც, რომ მეფე მეფობს, მაგრამ არ მართველობს, როგორც იტყვიან. მას ჩამოაცალეს არა მართო სარდლობა, სხვა „ხელობაც“: გამგებლობა, მსაჯულობა... პირველ ადგილს იჭერს მთავრობა. ძველად ასე არ ესმოდათ ალბათ, მთავრობა მთავრის პირველობას, მეთაურობას აღნიშნავდა, მაშინ როდესაც დღეს მთავრობა უმთავროდ საერთო წესია.

უნდა ითქვას, პირველი ხელის-უფლიდან მთავრობამდე

განვითარების დიდი მანძილია, მრავალი საუკუნე, ათასწლეული წლები. ჯერ თვით ხელის-უფალიც უბრალო მფლობელად არის წარმოდგენილი რამე საგნისა, როგორც ზევით დავინახეთ. იმდენად აღმოუფხვრელია ეს წარმოდგენა საუკუნეთა გასწვრივ, რომ მეფენი და მთავარნი ქვეყნისა და ხალხის მფლობელად იხსენიებიან. დემოკრატიული ინგლისის მეფე დღესაც ხმარობს თავის სეფე-სიტყვაში: „ჩემი ქვეყანა, ჩემი ხალხი“. უძველეს დროს ამ ფრაზებს ასეთი უმანკო ხასიათი როდი ჰქონდა, მეფე იყო ყველასი და ყველაფრის არა სიმბოლიური, არამედ ფიზიკური მფლობელი: მიწა-წყლის, ყოველი სულდგმულის, ადამიანის.

პირველი მფლობელი მეფე არ იყო უეპველად. უნდა ვიფიქროთ, რომ ვინც პირველად გააკეთა იარაღი, ჩასდო მასში თავისი შრომა, ისაა მისი მფლობელიც. აქედან ფლობის და განკარგულების, ე.ი. სრული საკუთრების შეგნება თავდაპირველად იარაღზე ვრცელდება. იარაღს მისი გამკეთებელი თან ატარებს, ძილშიც განუყრელია მისგან, საფლავშიც კი ატანენ მას, როცა მოკვდება. შემდეგ საკუთრების სფერო ფართოვდება, იარაღიდან სხვა მოძრავ საგნებზეც გადადის, ყოველ სულდგმულზე, თვით ადამიანზე. ადამიანის ადამიანისაგან დასაკუთრება კი შლის პირველყოფილ ოჯახურ სისხლ-ნათესავურ ურთიერთობას და ჰქმნის ისეთ დაჯგუფებათ, სადაც ძალა და ძალმომრეობა ნამდვილი დამაკავშირებელი დულაბია.

აქ უკვე საქმე გვაქვს სახელმწიფოს პირველ ჩანასახთან. სათავეში მყოფი ხელის-უფალი თავითვის იჩემებს ყველასა და ყველაფერს, უფალი ღვთაებად ხდება და ჩვენ ვიცით, რომ აღმოსავლეთის დიდ დესპოტებს თავყანსა სცემდენ, მზე და მთვარეს აღარებდენ, ადამიანებს სწირავდენ. მაგრამ ეს ძალმომრეობა და შიში მანიც ვერ ახერხებს გაუქარწყლოს ადამიანს ხსოვნა, რომ ისიც იყო ერთ დროს რალაციის მქონე და ეხლა კი არაფრის მქონეა, თვითონაც სხვის კუთვნილებაა. განა საეჭვოა, რომ შეტაკება, ბრძოლა კუთვნილ და მიმკუთვნილ ადამიანთა შორის გარდაუვალია? შინაარსი და ფორმა ამ



ბრძოლისა ერთნაირი არაა, რაც უფრო უკან იხედები გასულ საუკუნოებისაკენ, მით უფრო ველური და ბარბაროსული გეჩვენება ისინი.

აქედან, მონობის წარმოშობა შორეული წარსულის წყვილადში უნდა ვეძიოთ. დასაწყისში მონისა და მისი უფალის ურთიერთობა უთუოდ უშუალო იყო, პირველსა ფლობდა მეორე, როგორც ყოველ სხვა საგანს, უსულოს თუ სულიერს, უნდოდა ამუშავებდა, გაყიდოდა, გააჩუქებდა, უნდოდა მტერს შეაკლავდა ან თვითონ დაკლავდა, შეიწირავდა — ერთის სიტყვით, სრულს მის განკარგულებაში იყო. მაგრამ იყო შემთხვევებიც, როცა უფალი ანთავისუფლებდა მონას და უკანასკნელი თვითონ იმონებდა სხვებს, ხდებოდა მონათა მფლობელი. ეს მით უფრო ბუნებრივი იყო, რომ პირველი უფალის სამფლობელო თანდათან ფართოვდებოდა, მისი მოვლა რთულდებოდა, მოითხოვდა დამხმარეთ. ვინ უნდა ყოფილიყვნენ ეს დამხმარენა, თუ არა მხედარნი, რომელთა მეთაური მუდმივ ომს აწარმოებდა, ესხმოდა, სრავდა თუ თავს იცავდა. აი, ეს მხედარნი თავისუფლდებიან მონობისგან, თვითონ იძენენ მონებს, მათი ხელობაც ომია და არა მუშაობა. მხედართა გვერდით თქვენ ხედავთ ქურუმებს, რომელთა დახმარება მით უფრო აუცილებელია, რაც უფრო ძლიერია ჯერ კიდევ ცრუმორწმუნოება, წარმართობა, აქედან ესეც ახალი ხელობა. ხელობის გვერდით ხელოსნობაც მნიშვნელოვან ადგილს იჭერს თან და თან. სხვა არა იყოს რა, წავიდა ის დრო, როცა უფალი-მხედარი თვითონ აკეთებდა საომარ იარაღს. უკანასკნელი უმჯობესდება, დიდია მოთხოვნილებაც მასზე, საჭიროა ცალკე კატეგორია მონებისა, რომელიც მარტო იარაღს აკეთებს, სხვას არაფერს — აი ხელოსნობაც. ხელოსანს შეგირდებიც ჰყავს, მონები, მაშ შეიძლება თვითონ უსტაბაში განთავისუფლდეს, თუმცა ეს არაა კიდევ აუცილებელი. ასე წარმოიშვა მთელი რიგი სხვა ხელოსნების: ხურო, მჭედელი, თერძი და სხ.

მხედარნი, ქურუმნი, ხელოსნები დროთა განმავლობაში კასტებად იქცევიან, იყინებიან, მემკვიდრეობით გადადის მათი



ხელობა. მეფობის დროს სახელმწიფო უკვე ჩამოსხმულია იერარქიულად: ზევით მეფე, ქვევით მხედარნი, ქურუმნი, ხელონები, ბოლოს ხალხი, მონად ქცეული. ამ დროს ახალი ხელობაც ბევრი ჩნდება: წესიერების დამცველნი, ხარკის ამკრეფნი, მღვანელები, მსაჯულნი, მოურავნი, დიდებულნი, ვეზირ-ნაზირნი, ერთის სიტყვით, ბიუროკრატია, რომლის როლი, რაც დრო გადის, დიდდება.

ზემოთა ვსთქვი, რომ ზოგჯერ მონაც თავისუფლდებოდა მეოტი, რას ნიშნავს ეს? ის ხდებოდა თავის-უფალი, ე.ი. სხვა არავინ იყო მისი უფალი. ეხლა ის სხვის უფლად ქცევას ლამობს. მონობის ხანაში სხვაგვარ ვერც კი წარმოიდგენდნ თავისუფლებას: რა თავისუფალია, თუ მონა არა ჰყავს, თუ არ ღვრის მისთვის ოფლს, არ ანთავისუფლებს მას შრომისაგან! ყველასი მისწრაფება იყო, მაშასადამე, არა მონობის მოსპობა საზოგადოდ, არამედ თავის და სხვის უფლად გახდომა.

მაგრამ დროთა ვითარებაში ეს უფრო და უფრო ძნელი ხდება, იერარქიულად ჩამოსხმული სახელმწიფო ამას ეწინააღმდეგება, კასტებიც თავის პრივილეგიებს იცავენ, არ უშვებენ შავ ხალხს თავის წრეში. უფრო უარესიც: ხშირად ახლად განთავისუფლებულს ისეც მონობის უღელში უკრავენ თავს. დგება დრო, როცა თავის-უფლად ყოფნაც ფასდება, თუ გინდ სხვის უფალიც ვერ გახდე. იწყებენ მის დაცვას, ეძებენ მფარველს, რადგან საკუთარის ძალით დაცვა არც ისე უზრუნველყოფილია.

და ასეთ მფარველსაც ნახულობენ. თავდაპირველად ეს ყოფილი უფალია, შემდეგ უფლის უფალი, რომელიც მასზედ ძლიერია, და ბოლოს ყველასი უფალი, — მეფე. როგორც ხედავთ, უმაღლეს საფეხურს, ვსთქვით ტახტს, არავითარი უშუალო კავშირი არა აქვს ყოფილ მონასთან, დღეს კი თავისუფლთან, მეფე ისე შორსაა, რომ ის უჩინარი ხდება მისთვის, უზენაესი, და, მიუხადავად ამისა, რიდი, უკეთ — შიში მეფის წინაშე იცავს მას ძალმომრეობისაგან.

აი, აქ ცხადდება პირველად ხელის-უფალი თავისი ნამ-



დვილი მნიშვნელობით. ხელი უკვე არ აღნიშნავს შიშველ მკლავს, ისე როგორც უფალი არ მოასწავებს უშუალო ფლობას, საკუთრებას. ხელი დარჩა ხმარებაში, როგორც სიმბოლო, ხოლო ნამდვილად ნიშნავს ავტორიტეტს და ანსახიერებს მას დიდი უფალი, მეფე, აქედან ხელის-უფლებაც. მეორეს მხრით, სიტყვა თავის-უფალი თანდათან ზოგად ცნებად იქცევა, ტყუილება: თავისუფლება, და მოასწავებს არა მარტო თავის-თავის, არამედ სხვებისაც, ყველასი უფლებას. რასაკვირველია, ძველად ყველასი უფლებაზე ლაპარაკიც ზედმეტია, ასეთი რამ ბუნებაშიც არ მოიპოვებოდა, როგორც იტყვიან. უთანასწორობა საერთო წესი იყო, ერთს მეტი უფლება ჰქონდა, მეორეს ნაკლები, მონას კი სულაც არ ჰქონდა იგი, უუფლებო იყო.

მაგრამ დგება დრო, როცა მონის სიკვდილ - სიცოცხლეს არ სწყვეტს უშუალოდ მისი უფალი, ერევა გარეშე ძალა, ხელისუფლება. აქ ეყოფა ერთმანეთს კერძო და საჯარო უფლება: ის, რაც ცალკე ადამიანის უფლებაშია, და ის, რაც მასზე ზევით მდგომს, მეფეს და მის მოხელეთ ეკუთვნისთ.

ამ რიგად, ზოგადი ცნება უფლება მხოლოდ სახელმწიფოს შეეძლო წარმოეშვა. მართლაც, თუ ყველანი თავისუფალი არიან და არაეინაა მათი უფლებრივი ურთიერთობის გამწესრიგებელი, ზედმეტია სახელმწიფოზე ლაპარაკი, საქმე გაქვთ თვითნებობასთან, ქაოსთან. ასეთი მდგომარეობა ცხოველებსაც არ სჩვევიათ, არა თუ ადამიანებს. პირველყოფილ საზოგადოებაშიც რალაც წესი არსებობდა, რომელიც გადადიოდა თაობიდან თაობაზე, იქცეოდა ზნე - ჩვეულებად, ადათად, იღებდა სარწმუნოებრივი დოგმის სახესაც. ყველა ეს დაუშრეტელი წყარო იყო სახელმწიფოს მიერ უფლების შესაქმნელად, დასამკვიდრებლად.

აიღეთ, როგორც მაგალითი, მოსეს ათი მცნება, რომელმაც ასეთი დიდი როლი ითამაშა კაცობრიობის ისტორიაში. როცა ის გაჩნდა, ებრაელებს არ ჰქონდათ თავისი სახელმწიფო, დაძრწოდენ უდაბნოში, მაგრამ სამაგიეროდ ისინი ცხოვრობდენ ფარაონთა სახელმწიფოში — ეგვიპტეში, საიდანაც

განვიდენ და თან წაიღეს შეგნება იმაზე, რაა დასაშვები თუ დაუშვებელი საზოგადოებრივი ცხოვრებისათვის. ნუ მოჰკლავ, ნუ მოიპარავ, ნუ იმრუშებ, და სხ. უთუოდ საყოველთაო წესად, ნორმად იყო აღიარებული ფარაონთა ეგვიპტეში და ვინც დაარღვევდა, ისჯებოდა მოხელეთა მიერ. როცა განვიდენ, ებრაელთ მოხელენი თან არ გაყოლიათ, ამიტომ არღვევდენ კიდევ, აქედან ათი მცნება და ხალხის დაყოფა ნათესაობის მიხედვით და უფროსების მიჩენა. ეს უკან დახევა იყო შედარებით იმასთან, რაც ეგვიპტეში არსებობდა, მაგრამ შემდეგ, როცა სახელმწიფოდ იქცენ, ებრაელებმაც შემოიღეს ხელისუფლება, დამოუკიდებლად ნათესაობისა.

ხელისუფლების სფერო თავდაპირველად დანაშაულზე ვრცელდებოდა და დასჯაც თითქო წინანდელ ადამის სისხლის აღებას უდრიდა. ქართული გამოთქმა: სისხლის სამართალი, ნათლად მოწმობს ამას. მაგრამ დროთა ვითარებაში ხელისუფლება უფრო ჰუმანიური, ადამიანური ხდება. დასჯას სარჩულად უდევს არა შურისძიება, არამედ მიზანშეწონილება, რათა სახელმწიფო დაცულ იქმნას მავნე ელემენტებისაგან. იმავე დროს ადამიანთა ქონებრივი დამოკიდებულებაც, დავა მათ შორის ნივთზე თან და თან ეყოფა სისხლის სამართლის სფეროს და შეადგენს სამოქალაქო სამართალს, სადაც ლაპარაკია არა დანაშაულზე და დასჯაზე, არამედ საკუთრების დარღვევაზე და მის აღდგენაზე.

არავისა აქვს უფლება, გარდა სპეციალურად მიყენებული მოხელისა, თვითონ იკისროს დამნაშავის დასჯა, გასამართლება, ან კიდევ ქონებრივი დავის თავის ნებაზე გადაჭრა. ყველა ეს შედის საჯარო ხელისუფლების — **pouvoir public** — სფეროში, მის უფლებასა და მოვალეობას შეადგენს. მოხელე არაა პირადად დაინტერესებული ჩადენილ დანაშაულში, არც ქონებრივ დავაში, ამიტომ მისი მსჯავრიც, გამომდინარე საზოგადოებრივი ინტერესებიდან, შედარებით, უფრო მიუდგომელია და სამართლიანი.

მაგრამ, გარდა კერძო უფლების დაცვისა, ხელისუფლე-





ბას აუარებელი სხვა მოვალეობაც აწევს კისერზე: სახელმწიფოს დაცვა გარეშე მტრისაგან და ამისათვის შეიარაღებული ძალის შენახვა, გზების გაყვანა და სხვ. წარმოება-ვაჭრობაც ხომ განსაკუთრებულ მზრუნველობას მოითხოვს, აგრეთვე ხელოვნება, მეცნიერება, საზოგადოდ განათლების საქმე.

არაა საჭირო ყველა დარგის ჩამოთვლა, ეგ ძნელიცაა, რადგან, რაც დრო გადის, მათი რიცხვიც მატულობს. მატულობს პარალელურად სახელმწიფო დაწესებულებათა და მოხელეთა რიცხვი, რომელთა შესანახავად ხელისუფლება აწესებს გადასახადებს.

ყველა ეს წესები, ბრძანებანი, კანონები, გამომდინარე საჯარო ხელისუფლებიდან, სავალდებულოა ხალხისათვის, და თვითეული მისი წევრისათვის; ვინც არ ემორჩილება, ეურჩის მათ, ისჯება. მაშასადამე, სახელმწიფო, პირველ ყოვლისა, ძალდატანებითი ორგანიზაციაა, რომლის ხელისუფლება მით უფრო მკაცრია, რაც უფრო ბნელია და ურჩი თვით ხალხი.

ცოტა რამ ისტორიიდან

სახელმწიფოს არსებობის პირველ ხანებში ხელისუფლება სხვაგვარ არ შეედლო წარმოედგინა ხალხს, თუ არა შაშველ ძალმომრეობად, მტარვალობად. ეს ბუნებრივიცაა ჯერ იმიტომ, რომ ხალხის უმრავლესობა მონებისგან შესდგებოდა, რომლის ოფლი და სისხლი სახელმწიფოს ნამდვილი ფუძე იყო, და, თუ მაინც კისრულობს ვინმე მის სიციცხლის შენახვას, ეს არც კი განირჩევა ოთხფეხი ცხოველის შენახვისაგან, რომელიც არა ნაკლებ საჭირო იყო მისი პატრონისთვის. სხვა არა იყოს რა, მონის შრომამ შეაძლებინა მცირე რჩეულთ, როგორც იტყოდა არისტოტელი, გამოეყენებიათ თავისი დრო ხელოვნების, ფილოსოფიის, მეცნიერების შესაქმნელად.

მაგრამ, გარდა რჩეულთა (ბერძნები მათ ეძახდენ *aristos* და უმატებდენ *kratos* — ძალა, საიდანაც წარმოსდგა არისტოკრატია, ე. ი. რჩეულთა ხელისუფლება), იყო თავისუფალი ხალხი, რომელიც უშუალოდ განაგებდა საქვეყნო საქმეებს (ბერძნულად *demos* — აქედან დემოკრატიაც, სახალხო ხელისუფლება). მსგავსად ამისა ძელ რომშიც ვხვდებით, ერთი მხრით, პატრიციებს და, მეორეს მხრით, პლებებს, რომელთა შორის ბრძოლა მწვავე ხასიათს იღებდა და მისი საგანი ხელისუფლებისათვის ქიშპობა იყო.

რას ნიშნავს ეს? იმას, რომ ქვეყნის მართვა-გამგეობა უკვე არ ითვლება უბრალო ძალმომრეობად, აღიარებენ მის საჭიროებას, აუცილებლობას და მხოლოდ დაობენ იმაზე, ვის



შეუძლია უკეთ გაუძღვეს მას. წინააღმდეგ იმისა, რასაც ვხე-
დავთ აღმოსავლეთში, სადაც სუფევდა მეფე-დესპოტის-ნება,
ხშირად თვითნებობა, ძველ საბერძნეთსა და რომში ხალხი
გამოდის ასპარეზზე, პრივილეგიური წრეების გვერდით, და
ესენი იჩემებენ საქვეყნო საქმეებს (res publica). აქვე ჩა-
ისახა პირველად ხელისუფლების გასამება: კანონმდებლობა,
ასრულება, მართლმსაჯულება, რომელიც ახალ ხანაში ერთ-
გვარ ღოგმად იქცევა.

მაგრამ რომი, ისე როგორც მის ადრე საბერძნეთი, ჩაი-
ფლა შინაგან წინააღმდეგობათა წუშპეში, ხელისუფლება გა-
დაბიჭდა ისევ თვითნებობად, ტირანად, ცეზარიზმად, რომ-
ლის წინაშე თავისუფალნიც მონად იქცენ და, ამ რიგად, საქვე-
ყნო საქმეებს მოაკლდა მათი მზრუნველობა და თვით ქვეყნის
ბედსაც გულგრილად უცქერენ ისინი. ნუ დავივიწყებთ, დე-
მოსი და პლემბსი ისედაც მთელი მოსახლეობის უმცირესობას
შეადგენდენ და უმრავლესობა უუფლებო მონები იყვნენ.

დადგა საბედისწერო ხანა რომისათვის, როცა მას კარზე მო-
ადგნენ ჩრდილოეთიდან გერმანული მოდგმის ბარბაროსები და
მილენწ-მოლენწის ოდესმე უძლიერესი იმპერია. იწყება საშუა-
ლო საუკუნოები მისი ფეოდალიზმით, ბატონ-ყმობით, ინკვი-
ზიციით, გაუთავებელი ომებით, რომლის მეოხებით ჩნდება
დიდი სახელმწიფო-ერთეულები.

ეს უკვე ახალი ხანაა, როცა მეფე განაგებს ქვეყანას „ნე-
ბითა ღვთისათა“, ნამდვილად კი ბიუროკრატია ეპატრონება
ყველასა და ყველაფერს. აბსოლიუტური მონარქიის დასაყრდ-
ნობი ბიუროს, ხალხია, მოხელენი და ესენი კი ცხოვრების ყო-
ველ მხარეს, ინდივიდუალურ თუ საზოგადოებრივ ყოველ ნა-
ბიჯს სასტიკ რეგლამენტაციას უმორჩილებენ. თითქო ყველა-
ნი თანასწორი არიან ხელისუფლების წინაშე, ნამდვილად კი
თანასწორობა გამოიხატება უუფლებობაში; ხდება ატომიზა-
ხაცვა და ნიველიზაცია მთელი ხალხისა, თვითმოქმედება და
თაოსნობა, ინიციატივა დევნილია ... რაღა გავაგრძელო, ზე-
ვით აბსოლიუტური მონარქი, უკეთ — ბიუროკრატია და მისი



„თაიგული“ კამარილა, ქვევით მთელი ხალხი, მისი ქვეშევრდომნი. ინგლისელმა პობსმა ლევიათანი ანუ გველეშაპი უწოდა ასეთ სახელმწიფოს კიდევ მე-17-ე საუკუნეში.

გამოდის, ამ რიგად, თითქო ადამიანი იმიტომ შექმნა სახელმწიფო, რომ თავის თავი დაება! მაგრამ აბსოლიუტიზმს თავისი დადებითი მხარეც ბევრი ჰქონდა, რომელიც სკარბობდა უარყოფითს. ჯერ ერთი, მან ალაგმა ფეოდალთა თავდასულობა, ბატონის და ყმის ურთიერთობა განსაზღვრულ ნორმებში ჩასვა, რომლის დარღვევისათვის ყმას შეეძლო შეერივლა მეფის მოხელისათვის და მსაჯულისათვის. დიდი ტერიტორიისა და მოსახლეობის ერთ სახელმწიფოს ქერ-ქვეშ მოქცევა უალრესად აწვითარებს წარმოება-ვაჭრობას, ჰქმნის დიდ ქალაქებს, ბურჟუაზიას, რომელიც სათავეში მოჰყვება განმათავისუფლებელ მოძრაობას აბსოლიუტიზმის ბორკილებიდან.

მაგრამ აბსოლიუტიზმს განმანათლებელსაც ეძახიან. რატომ? სატახტო ქალაქი და თვით ტახტი ხდება ერთგვარ ცენტრად, სადაც მწერლობა, ხელოვნება, მეცნიერება აღწევს უდიდეს განვითარებას. ამ გონებრივ მუშაობაში თავდაპირველად კეთილშობილნი სკარბობენ, ხოლო შემდეგ მასში მონაწილეობენ უშრალო მომაკვდავნიც, გამოსულნი მდიდარი ოჯახებიდან და მათი გავლენა იმდენად იზრდება თან და თან, რომ კეთილშობილნი და ტახტი მოგერებაზე გადადიან. ამ დროს წარმოიშვა სახელმწიფოს მართვა-გამგეობის თეორიული დასაბუთება, უფლების მეცნიერება; გაჩნდა ხელისუფლების ნამდვილი მატარებელი—მთავრობა, როგორც კოლეგია; ადამიანი და მისი უფლება განსაკუთრებულ ღირებულებად იქნა აღიარებული: თუ მას აწევს მოვალეობა სახელმწიფოს მიმართ, სახელმწიფოსაც აწევს მოვალეობა ადამიანის მიმართ.

ერთის სიტყვით, ხდება ნამდვილი რევოლუცია, ჯერ მხოლოდ თეორიული, ფსიქოლოგიური, რომელიც არ აყოვნებს პრაქტიკაში გადავიდეს და გადაიქცეს მძლავრ ხალხოსნურ მოძრაობად მთელი წყობილების წინააღმდეგ.



აბსოლიუტიზმმა, მართალია, ალაგმა ფეოდალები, მაგრამ ბოლოს ისინი ტახტის მსახურებად აქცია და ბევრი წინანდელი პრივილეგიები შეანარჩუნა, რომლის ქვეშ გმინავენ გლეხები. ქალაქშიც ბურჟუაზია ვერ ჰპოვებს წინანდელ მფარველობას ტახტის მხრით; უკანასკნელი, პირიქით, ადებს მას უფრო და უფრო აუტანელ გადასახადებს. წარმოება-ექსპორტაც ვერ შლის ფრთას და ამის მიზეზი ძველადანვე დარჩენილი ამქრული სალტებიანია. სილატაკე სოფლიდან ქალაქში ერეკება გლეხებს, სადაც ისედაც ბევრია მუშები; ჯერ კიდევ ნორჩი სამანუფაქტურო წარმოება ვერ იტევს მათ, უმუშევრობა და უკმაყოფილება იპყრობს მშრომელ ხალხს.

იწყება ხანა დიდი და პატარა რევოლუციებისა, რომელიც, ათეული წლების შესვენებით, ერთი ქვეყნის მეორეთი შეცვლით, მთელს დასავლეთ ევროპას ედება და გრძელდება მე-17-ე საუკუნის მეორე ნახევრიდან მე-19-ე საუკუნის მეორე ნახევრამდე. ეს ორი საუკუნე გაელენთილია სისხლით, ომები გარედან და არეულობანი შიგნით ერთმანეთს სცვლიან, უამრავი ხალხი იმსხვერპლა ცეცხლმა და მახვილმა, მაგრამ მიღწევებიც დიდია, განუზომელი. ყველგან ბოლოს და ბოლოს ბურჟუაზია იმარჯვებს; ქვეშევრდომი მოქალაქედ იქცევა; მყარდება თავისუფლება სიტყვის, წერის, კავშირების. საძირკველი ეყრება ახალ სოციალ-ეკონომიურ წყობილებას — კაპიტალიზმს; პოლიტიკაშიც იმარჯვებს ხალხოსნური პრინციპი, სახელმწიფოს განაგებენ „ნებითა ხალხისა“, რომლის გამომხატველი პარლამენტია; კერძო და საჯარო უფლება ზუსტად გამოიჯნულია და ჰპოვებს თავის განსახიერებას უფლებრივ სახელმწიფოში, სადაც თვითნებობა აღკვეთილია.

კაპიტალისტურმა ხანამ, აღსავესემ პოლიტიკური და სოციალ-ეკონომიური გარდაქმნებით, ადამიანი თავისუფალი გახადა, ის არაა არავის ყმა, არც მონა ან ქვეშევრდომი, არ არის მიჯაჭული მიწაზე, არც დაზგაზე, მიდი-მოდის სადაც უნდა, ერთის სიტყვით, ცა ქუდი და მიწა ქალამანია მისთვის, ხალხური თქმულების არ იყოს.



მაგრამ ეს უაღრესი მიღწევაც უფრო წუთიერი გატაცება გამოდგა, ვინემ სინამდვილე, უფრო სიტყვა, ვინემ საქმე, თავისუფლება, თანასწორობა და ძმობა ჯერ კიდევ მისაღწევი იდეალია, თუმცა ცხადია, რევოლუციების დიდი მემკვიდრეობა ჩვენ უკვე გვაახლოებს მის განხორციელებასთან, ერთი დიდი ეტაპი გავლილია.

ბურჟუაზიამ გაიამზანაგა მუშები ბარიკატებზედ ბრძოლაში და არა გამარჯვებაში, მისი ნაყოფის სამართლიანად განაწილებაში. თავისუფლება მოასწავებდა ბურჟუაზიისათვის წარმოება-ვაჭრობის განუსაზღვრელ განვითარებას და ამისათვის მუშების კიდევ უფრო განუსაზღვრელ ექსპლუატაციას. უკანასკნელნი თავის ნებით ებმიან ამ ახალ უღელში, რადგან მათ, გარდა სამუშაო ძალისა, სხვა საკუთრება არ გააჩნიათ, პროლეტარები არიან. ეს სიტყვ კიდევ ძველ რომში იყო ცნობილი: *proletarius*, მცხოვრებთა დიდ უმეტესობას ეძახდნენ.

მაგრამ მე-19-ე საუკუნეში სულ ახალი მნიშვნელობა მიეცა მას. ვეება ფაბრიკა-ქარხნების ჰერ ქვეშ, ერთსა და იმავე შრომის პირობებში მოქცეულნი, მუშები უახლოვდებიან ერთმანეთს, გრძნობენ სოლიდარობას და ამჟღავნებენ კიდევ მას, მით უფრო, პოლიტიკურად უკვე თავისუფალი არიან.

გახსოვთ, ბურჟუაზია თავის რევოლუციურ გამორულ ხანაში მესამე წოდებას ეძახოდა თავის თავს, განსხვავებით პირველი და მეორე წოდებისაგან, სასულიერო და საერო თავად აზნაურობისაგან. მაგრამ რევოლუციებმა წოდებანი გააუქმა, ყველანი თანასწორი გახადა პოლიტიკურად, მაშასადამე, მუშებსაც არ შეეძლოთ მეოთხე წოდებად გამოეცხადებინათ თავი, აქედან ახალი სიტყვა — კლასი, მუშათა კლასი. ესეც ცნობილი იყო ძველ რომში: დიდ მემამულეთ, ლატიფუნდიების მფლობელთ სხვა და სხვა კლასებად ჰყოფდნენ მაშინ, სამფლობლოს სიერკის მიხედვით. ბურჟუაზია და პროლეტარიატიც, მსგავსად ამისა, ნივთიერად განირჩევიან ერთმანეთისგან, არიან სხვა და სხვა კლასები, აქედან კლასთა ბრძოლაც.

კლასთა ბრძოლას პირველ ხანებში ეკონომიური ხასია-



თი ჰქონდა, შემდეგ ის ძალაუზნებურად პოლიტიკურად იქცა, აქედან პარტიების წარმოშობაც. გახსოვთ ჟირონდისტების და იაკობინების კლუბების როლი საფრანგეთის დიდ რევოლუციის დროს. კლუბები იგივე ორგანიზაციებია, რომელსაც თან და თან მუდმივი ხასიათი ეძლევა, თავისი წესდებითა და პროგრამით.

კლასნი და პარტიები გაუგონარ დინამიკურ ძალად იქცევიან და ბრძოლა მათ შორის იღებს ისეთ სიმწვავეს, ისეთ დიმენსიას, რომ სხვა ყველაფერი ამ მთავარი ღერძის ირგვლივ ტრიალებს თანამედროვე სახელმწიფოში. უკანასკნელიც სადავო საგნად იქცევა კლასთა შორის, ყველანი მის ხელში ჩაგდებას ესწრაფვიან, ხელისუფლება მათი მიზანია.

მუშების დარაზმულობა სამ შტოდ: პარტია, სინდიკატი, კოოპერატივი და მათი აქტიური მონაწილეობა სახელმწიფო, საერობო, საქალაქო, სასოფლო მართველობაში იღებს ისეთ განვითარებას, რომ კლასის ჩარჩოები განიერდება თან და თან და შიგ იტევს არა მარტო მუშას, არამედ გლეხსაც, ხელოსანს, მიკიტანს, მოხელეს, ინტელიგენციას, ე.ი. ყველა იმათ ვინც თავის და არა სხვისი შრომით ცხოვრობს, ერთის სიტყვით, მთელს ეგრედ წოდებულ წვრილ ბურჟუაზიას. ხმარებაში შემოდის მუშათა კლასის გვერდით, ან კიდევ მის მაგიერ მშრომელი კლასი, რომელიც თავის რაოდენობით ხალხის დიდ უმრავლესობას შეადგენს, არის, თუ ვნებავთ, თვით ხალხი, დემოკრატია.

მართველი კლასის დარაზმულობა არც ისე იმპოზანტურია გარეგნულად, ერთი იმიტომ, რომ მსხვილი ბურჟუაზია მცირე - რიცხოვანია; მეორეც იმიტომ, რომ მას არ ექვივრება, გაურბის კიდევ თავის ძლიერების გამოფენას. განა მისი წრიდან არაა გამოსული მთავრობა, ჯარის, აღმინისტრაციის, მართლმსაჯულების მეთაურნი? უკეთესი ორგანიზაციები აბა ვისა აქვს! საკმარისია, დიდი ქარხანა-ფაბრიკიდან ტელეფონის უბრალო აწყარუნება, რომ ხელისუფლების ყველა ბიუროებიდან ერთი ალიაქოთი ასტეხონ „ურჩი ხალხის დასამშვიდებლად“;



მთელი პოლიცია და ჯარი ფეხზე დადგეს და სახელმწიფო „განსაცდელში“ გამოაცხადონ. ეხლა ნახეთ დიდი პრესა, თუ როგორ მოსდოს ქვეყანას „ლალატი“ და ბევრი სხვა ოინები, რომელსაც ვითომ მუშათა ორგანიზაციები სახელმწიფოს წინააღმდეგ სჩადიან. დიდი ბანკების გავლენა? ტრესტების? კარტელების? მათი მეთაურები თითებზე ჩამოითვლებიან. საკმარისია, ერთ ბიუროში შეიკრიბონ და ითათბირონ, რომ მათი გადაწყვეტილება ხალხის „უზენაეს“ ნებად გამოცხადდეს და მის სისრულეში მოყვანას მთელი ბიუროკრატია შეუდგეს. დიდი ომის წინ ერთი ანექლოტი დადიოდა ევროპაში: თუ გინდა გაიგო იქნება თუ არა ომი, როტშილდის ცოლს მიმართეო!

მაგრამ დემოკრატიის ძლევა მოსილების წინსვლამ ყველა დაბრკოლებები, მაზინაციები სძლია და მისი ხმა პარლამენტის ტრიბუნლიდან თან და თან ჰფარავს მართველი წრეების ხმას. ეს ნორმალური ევოლიუცია შესწყვიტა დიდმა ომმა, ხოლო მის გათავებისას თითქმის ყველგან იგივე დემოკრატია მოჰყვა სათავეში ქვეყნის მართვა-გამგეობას. საყოველთაო, თანასწოარი, პირდაპირი და საიდუმლო არჩევნები ძირითად უფლებად იქცა სახელმწიფო მართველობაში, ისე როგორც ადგილობრივ თვითმართველობაში. ხელისუფლება „ნებიითა ხალხისა“ სინამდვილედ იქცა...

მე დავიწყე იმით, რომ დავსვი კითხვა რაა სახელმწიფო; ვცადე ერთგვარი ანალიზი ხელისუფლებისა; მიმოვიხილე სახელმწიფოს განვითარების ზოგიერთი მნიშვნელოვანი საფეხური ისტორიაში — და ეხლა კი დროა წარვუდგინო მკითხველს ჩემი პასუხიც.



სახელმწიფო არის ადამიანთა ისეთი შეერთება, რომელიც ერთი ხელისუფლების ქვეშ, განსაზღვრულ ტერიტორიაზე ცხოვრობს.

სახელმწიფო უფლებრივი შეერთებაა იმდენად, რამდენად სახელმწიფოს უფლება ადამიანზე შეზღუდულია ადამიანის უფლებით სახელმწიფოზე. მოხდა ერთგვარი დაზავება, ნეიტრალიზაცია ორთავეს მოქიშპე ინტერესებისა და მისწრაფებათა.

სახელმწიფო შეიძლება მორალურ შეერთებად იქცეს, და ეს იმდენად, რამდენად თვითთული მისი წევრი იჩემებს არა მარტო უფლებას, არამედ კისრულობს მოვალეობასაც პატივი სცეს სხვის, პირველ ყოვლისა, მთელის, სახელმწიფოს უფლებას ყველაზე და თვითთულზე. ამ შემთხვევაში საქმე გვაქვს უფრო მორალურ, ვინემ უფლებრივ შეერთებასთან.

ასეთი ნებაყოფლობითი, მორალური შეერთება ადამიანთა უმაღლესი განვითარების ნაყოფია, მოწინავე ქვეყნების და ერთა ისტორიული ხედრი, საკაცობრიო იდეალი.

სახელმწიფოს ადარებენ ორგანიზმს, ვითომ მას სული უდგია, აქვს ნებისყოფა, როგორც ცალკე ადამიანს. ეს ანალოგია სწორია, მოსწრებელიც, რამდენად ადამიანთა მექანიკური შეერთება ორგანიულ შეერთებად ქცეულა, რამდენად ხალხი ეროვნებად გარდაქმნილა. გაიხსენეთ ყაჭი და მისგან გამოსული მატლი. ასეთია სახელმწიფოსა და ერის ნათესაობა, მეტაფორა რომ ვიხმაროთ.

II

მ რ ი

სახელმწიფო - მარი

თავის ისტორიულ წინსვლაში სახელმწიფო აღწევს განვითარების იმ მაღალ საფეხურს, რომელიც მას ათანაბრებს ცოცხალ ორგანიზმთან. მართლაც, თუ ანალოგია მოსატანია, ესაა მხოლოდ ადამიანი, რომლის თვისებებს აწერენ სახელმწიფოს, რომლის აგებულებასა და არსს უკანასკნელის მოდელად იყენებენ. ეს შით უფრო ბუნებრივია, რომ სახელმწიფოს როგორც შემქმნელი, ისე მკვლევარი იგივე ადამიანია. თუ დაბადებაში ვკითხულობთ ადამიანს ღმერთმა შთაბერა თავისი სულიო, მეცნიერება ხომ ამბობს, პირიქით, რომ ღმერთი ადამიანმა შექმნა, მზგავსი თავის თავისაო!

მაგრამ ადამიანის ქმნილება, როგორც დავინახეთ, სულაც არ იყო წინეთ ისეთი უნაკლულო, შედარებით, როგორც დღესაა. წინა-ისტორიულ ხანებსაც თვალი რომ ავარიდოთ, სახელმწიფო წარმოგვიდგება შიშველი ძალმომრეობის მექანიზმად. ხალხის დიდი უმრავლესობა მონა იყო, ყმა, ქვეშევრდომი, მოკლებული უფლებას, ხმას, გავლენას. რა თქმა უნდა, ერთი მდგომარეობიდან მეორეში გადასვლა, მეორიდან მესამეში, ისე როგორც თვით წყობილება: დესპოტიზმი, ფეოდალიზმი, აბსოლიუტიზმი, თავის თავად წინსვლას მოასწავებდა, მაგრამ მოსახლეობა, ხალხი მაინც არ წარმოადგენდა ამ ხანებში მთლიან ერთეულს, ორგანიზმს, ეროვნებას.



აბსოლიუტიზმი; პირიქით, ხალხისა და საზოგადოების დაქსაქსვისაკენ, ადამიანის განმარტოებისაკენ იყო მიმართული, მაგრამ პარალელურად მეორე პროცესსაც ჰქონდა ადგილი, გამაერთიანებელს, და ეს ხდებოდა ნიეთიერი და გონებრივი წარმატების მეოხებით. მაშინ იშვა დასავლეთში ნამდვილი სამწერლო ენა, რაიცა სინამდვილეში მწერლობის ხალხისთვის გასაგებ ენაზე მოვლინებას მოასწავებდა. თუ გავისხენებთ, რა დიდი როლი ითამაშა მარტო რეფორმაციამ ლათინური ენისა და სქოლასტიკის ბატონობისაგან განთავისუფლებაში, ადვილად წარმოვიდგენთ ორიგინალური მწერლობის მშობლიურ ენაზე აყვავებას თვითიველ სახელმწიფოში. ნიადაგი ეცლება განათლებულ საზოგადოებაში ადგილობრივ კილოკავებს, პროვინციალიზმს და ყველგან, როგორც მწერლობაში, ისე დაწესებულებებში ერთს საერთო ენას ხმარობენ, მრავლისგან შეზავებულს, გაწმენდილს, საბოლოოდ ჩამოყალიბებულს.

მაგრამ ეროვნული მწერლობის უპირველეს საგანს, მის რჩეულ თემას ჯერ მაინც ცალკე ადამიანი შეადგენდა, მისი უფლება, ღირსება, საზოგადოდ ადამიანობა, რასაც ჰუმანიზმი ეწოდა.

ქვეშევრდომობა ერთგვარი წინსვლა იყო იმ მხრივ, რომ არსებობდა კანონი, რომლის წინაშე ყველას ქედი უნდა მოეხარა, მაგრამ თვით კანონი არ გამოხატავდა უფლებრივ თანასწორობას, არც იყო ყველას მიერ შექმნილი. ამისათვის საჭირო გახდა დიდი ხალხოსნური მოძრაობა, რევოლიუცია და, როგორც შედეგი, პოლიტიკურ ავანსცენაზედ გამოჩნდა მოქალაქე, ქვეშევრდომის მაგიერ, უფლება - მოსილი თავის და ქვეყნის საქმეში. აქედან ადამიანისა და მოქალაქის უფლება ძირითად კანონად იქმნა აღიარებული.

ცნობილია ისიც, რომ პირველი აღტყინების ჟამს ადამიანი თავის სახელმწიფო საზღვრებსაც არ სჯერდებოდა, მსოფლიოს მოქალაქედ მოჰქონდა თავი. ადამიანი დაბადებითვე თავისუფალია განურჩევლად ქვეყნისა და შთამომავლო-

ბისა; ყველანი ძმები ვართ, თანასწორნი, მაშასადამე, ერთი და განუყოფელი კაცობრიობის შვილნი. აი მაშინდელი აზროვნება, რომელსაც კოსმოპოლიტიზმი დაერქვა, — და სიტყვა საქმედ რომ ექციათ, რევოლუციური კონვენტი ყველა მოწინავე ქვეყნების ცნობილ მეცნიერთ, მწერლებს, პოეტებს საფრანგეთის მოქალაქედ აცხადებს და ზოგი მათგანი პარლამენტშიც კი იქნენ არჩეული.

მაგრამ რევოლუციის ცოტა ადრე ხმარებაში შემოვიდა ერი, ეროვნება. თავის საინტერესო წიგნში პ. მილიუკოვს მოაქვს სიტყვები, რომელიც საფრანგეთის გარეშე საქმეთა მინისტრს დარკენსონს ჩაუწერია თავის დღიურში 26 ივნის 1754 წელს: „ეროვნული იდეები იწყებს გაბატონებას და მათ შეუძლიათ შორს წაგვიყვანონ. შეიძლება აღვნიშნო, რომ არასდროს ისე ხშირად არ მეორდებოდა სიტყვები ერი და სახელმწიფო. ლუი მე-14-ეს დროს არავინ გამოსთქვამდა ამ სიტყვებს, წარმოდგენაც კი არ ჰქონდათ მათზე. არასოდეს არ გვექონებია იმდენი ცნობები ერის უფლებაზე და თავისუფლებაზე, როგორც დღეს. თვითონ მე, რომელიც მუდამ ვფიქრობდი და ვაგროვებდი მასალას ამ კითხვებზე, წინეთ სულ სხვა აზრისა ვიყავი, ვინემ დღეს.“*)

ეს ამონაწერი ზედმიწევნით დამახასიათებელია იმ ეპოქის, როცა მისი ავტორი სწერდა. ყოველ შემთხვევაში, სიტყვა ერი მაშინაც არ გასცილებოდა საზოგადოების მაღალ და განათლებულ წრეებს, მდაბიო ხალხი არ ფიქრობდა და არც გრძნობდა მის მნიშვნელობას.

მაგრამ ჩქარა დადგა ეს დროც, როცა ერი ყველასათვის გასაგები შეიქმნა. როცა საფრანგეთს მოადგენ გარედან მონარქიული პრუსიის და ავსტრიის ჯარები და გადალახეს მისი საზღვრები, მაშინ რევოლუციურმა კონვენტმა გამოაქვეყნა თავისი საეპოქო მოწოდება: „სამშობლო განსაცდელშია!“ ცნობილია, რა დიდი როლი ითამაშა ვალმის გამარჯვებამ, როცა პარიზის რევოლუციონერები ანუ, როგორც მაშინ

*) П. Н. Миллюков, «Национальный вопрос», 1925, გვ. 84.

ედახდენ: სანკიულოტები (უნიფხონი!) პირველად შეხვდნენ პირის-პირ პრუსიულ გაწვრთნილ ჯარს. ბრძოლის წინ მათმა სარდალმა, მარშალმა კელერმანმა, წამოაწყო რა თავისი ქუდი ხმალზე, ამართა ზევით და დასქექა: „გაუმარჯოს ერს!“ სწორედ ამ ისტორიულ დღეს, 20 სექტემბერს 1792 წ., წამოიძახა დიდმა პოეტმა გიოტემ, რომელიც მაშინ პრუსიის ჯარის ზურგში იდგა: „ამ ადგილიდან და ამ დღიდან მსოფლიო ისტორიის ახალი ხანა იწყება“. ისტორიკოსი, რომელიც ამ ცნობებს გვაწვდის, ასე ასკვნის: „პროფესიულ ჯარს, პასიური დისციპლინით, დაუპირდაპირდა ახალი ჯარი, გამსქვალული ადამიანის ღირსებისა და ეროვნული დამოუკიდებლობის გრძნობით. ერთის მხრით მეფეთა ღვთაებრივი უფლება, მეორეს მხრით ადამიანისა და ხალხთა უფლებანი“.**)

იმავე სექტემბერს 1792 წ. დაამდგრა პირველად პიანოს კლავიშებზე, სტრასბურგის ერთ ბურჟუაზიულ ოჯახში, რუჟე დე ლილმა თავისი უკვდავი ქმნილება, რომელიც, მარსელიეზის სახელით, ელვასავით მოედო მთელს საფრანგეთს და დღესაც მისი სწორუბოვარი ჰიმნია. ნარსელიეზის სიტყვები დღესაც გვადლევენს, მამულის სიყვარულით აღზნებული, ამამხედრებელი მეფე-მტარვალთა წინააღმდეგ, ადამიანისა და ერის თავისუფლებისათვის. სექტემბრის დიდმა გმირმა დანტონმა ეს მაღალი მამულიშვილობა თავისი სისხლით ჩასწერა ისტორიაში, როცა გილიოტინის წინ, 1794 წ., ასე მიუგო თავის მეგობრებს, ვინც მის გადარჩენას, გატაცებას ცდილობდა უცხოეთში: „განა შემძლია სამშობლო წაღებში ჩაეფინო და თან წაეიღო?!“.

სამშობლო, მამული, *la patrie*, აი რა აღმოჩენა გააკეთა რევოლუციურმა საფრანგეთმა, ხალხს თითქო გაუკვირდა, აქამდის სად ვიყავი, რად არ მომივიდა თავშიო! რევოლუციონერებმა პატრიოტი დაირქვეს მეტ-სახელად, და მათ შორის სანკიულოტები ზომ პატრიოტიზმის სიმბოლოდ გან-

***) Professeur Albert Mathiez, «La révolution française», tome II, 1924, გვ. 80—81.

დნენ: მათი ჩაცმულობა, ფრიგიული ქუდი სამფეროვანი ფოლაქით, მათი გიჟური კარმანიოლა, სიმღერა და იმავე დროს ცეკვა - ფერხული, ჟრიაბულისა ჰგვრიდა პარიზის ქუჩებს.


იშვა „მესია“ და ეს ამბავი ასე აუწყა კონვენტმა მსოფლიოს, გენერალი კარნოს პირით: „ჩვენი პრინციპი ისაა, რომ თვითთელი ერი, რაც უნდა პატარა არ იყოს ჭვეყანა, სადაც ის ცხოვრობს, სრული ბატონია თავის სახლში, თანასწორია უფლებით ყველაზე დიდ ერებისა და არავის ძალუძს კანონით მის დამოუკიდებლობას დაემუქროს“. კარნოს ამ საზეიმო განცხადებიდან უკვე გამომდინარეობს, რომ ერი არ არის მკვდარი **ობიექტი**, არამედ **სუბიექტი**, დაჯილდოვებული ნებისყოფით.

თუ აქამდისინ ნებისყოფის მატარებლად სახელმწიფო გამოდიოდა, ამიერიდან მისი ადგილი ერმა დაიჭირა. როცა სახელმწიფოზე დავიწყე მსჯელობა, მე დავასახელე ხელისუფლება, როგორც მისი სული, საფეთქელი. მაგრამ ვინ ატარებდა ამ სულს ბოლოს და ბოლოს? ტახტი, ბიუროკრატია. ხალხი განზე იდგა, ბრიყვი, ბნელი, თუმცა მის ზურგზე ებჯინებოდა თვით სახელმწიფო.

მართალია, თავის განვითარების ბოლო ხანებში სახელმწიფო ორგანიზმს დაემსგავსა, ამის მაჩვენებელი იყო ეროვნული მწერლობა-ხელოვნების აღმადგენა, ე.ი. ერი უკვე დაბადებული იყო, არსებობდა, მხოლოდ მას აკლდა თავის თავის შეგნება, არ ჰქონდა შეცნობა ვინ იყო, რა იყო. თვით მინისტრი დარჩანსონიც კვირობდა, ეგ რა ხილიაო!

ფრანგთა ერმაც სწორედ ეს რეზუსი გახსნა, სახელმწიფო მე ვარო (გახსოვთ, ამასვე ამბობდა ლუი მე-14-ტე!), ხელისუფალი, ბრძანებელი, ჩემი ნება კანონია, მაგრამ არა სხვისათვის, ჩემთვის, საფრანგეთის ხალხისათვის. კოლექტივი იქცა ერთადამიანად, ორგანიზმად, ფეხი აიდგა, დადის ამაყი, თავისუფალი.

ამიერიდან ფრანგულ პოლიტიკურ ლექსიკონში სახელმწიფო ერმა, ნაციაშე შესცვალა. კითხვაზე, რომელ სახელმ-



წიფოს მოქალაქე ხარ, ფრანგი მიუგებს, ფრანგთა ეროვნების მოქალაქე ვარო: *de la nationalité française!*. ამრიგად, როცა ფრანგი ამბობს ნაცია, *nation*, ის ამ სიტყვაში სახელმწიფოს გულისხმობს.

არსად, არც ერთ ქვეყანაში არ მომხდარა ასე ნათლად, ცხადად დასანახად, სახელმწიფოს ერად გარდაქმნა. თვით სხვა ქვეყნის მოქალაქეთაც ფრანგული ენა ასე გვაცნობს, მაგ., საქართველოს მოქალაქეს — *de la nationalité géorgienne*.

ნუ დავივიწყებთ მხოლოდ, რომ სახელმწიფო მაშინ იქცა ერად, როცა ქვეშევრდომი მოქალაქემ შესცვალა, როცა სახელმწიფოს სვე-ბედი მის მოქალაქეთ, მთელს ხალხს ჩაბარდა, ამისათვის იბრძოდა უკანასკნელი, ამისათვის მოახდინა დიდი რევოლიუცია.

ე რ ი — სახელმწიფო

როგორც დავინახეთ, სახელმწიფო ბოლოს და ბოლოს ერად იქცა, თანაბრობის ხაზი გაესვა მათ. ანალოგია ორგანიზმთან სწორედ ერს უფრო შეჰფერის, ვინემ სახელმწიფოს. როცა ამბობენ, ადამიანთა კრებულს აქვს, მზგავსად ცალკე ადამიანისა, სული, გული, გრძნობიერება, ნება, სურვილი, შესდგება უთვალავი უჯრედებისაგან, რომელთაგან ერთი კვდება, მეორე იზადებაო, — ასეთი კრებული მეორე სხვა არ შეიძლება არსებობდეს, გარდა ერისა.

გარდა ერისა, რადგან მარტო ის წარმოადგენს იმ რთულ კოლექტივს, რომლის ერთარსება ორგანიულად ჩამოსხმულია, აქვს ერთი სისხლი და ხორცი, ერთი ენა, თავგადასავალი, შიდრეკილება, ხასიათი, ნებისყოფა; რომლის წევრნი სუნთქავენ იმავე ჰაერს, სტკებებიან თუ იცრემლებიან იმავე ბუნებით, ებრძვიან მას, ერთმანეთსაც, კვდებიან, იზადებიან, ვითარდებიან ან უკან იხევენ, ბიჭდებიან... ეს ნუსხა სრული არაა, რა თქმა უნდა, უსარგებლოც, შეიძლება, რადგან ჩამოთვლილნიც: სისხლ-ხორცი, ენა, ხასიათი და სხვ. ცვალებადია, შერეული, შეზავებული; მაგრამ ეს არ უშლის, რომ ერმა თავის თავი მაინც ერთარსებად შეიცნოს, და ჩვენთვის კი სწორედ ესაა თავი და თავი, დანარჩენი მეორე თუ შესამე ხარისხოვანია მნიშვნელობით.

როგორ შეუძლია კოლექტივს, ერს ისე შეიცნოს თავისი თავი, როგორც ადამიანს, ორგანიულ სახეთა მეფეს? ეგეც ხომ რელატიურია რამაა, შედარებითი მსჯელობა და არა ხალასი ფაქტი. კოლექტივს ერთი თავი როდი აზია, არც ერთი

სული და გული აქვს, უეჭველად, მაშასადამე, თანაბრობის ხაზის გასმა ერსა და ადამიანს შორის შეუძლებელია. როგორ ვიპოვოთ ერის ერთარსება, სადაა მისი ჭურჭელი? ერის თვითეულ წევრში — აი ერთად ერთი შესაძლებელი პასუხი. მაშასადამე, ის ნიშნები, რომელიც ერს მივაკუთვნეთ, თვითეულ მის წევრს ეკუთვნის, ან მიეკუთვნება დროთა ბრუნვაში. თვითეული წევრი თავის არსში ატარებს კოლექტივის, ერის სულს, გულს, ყველა მის მიდრეკილებათ, არის თვითონ ერი, თუ გნებავთ, რამდენად სრულად და სავსებით არის განსახიერებული მასში კოლექტივი, რომელსაც ის ეკუთვნის.

მაგრამ ერთი ადამიანი ხომ მეორისაგან განირჩევა, თუ გინდ ორივენი იმავე ერს ეკუთვნოდნენ, როგორ შეიძლება ერთმა და მეორემაც ერთნაირად განსახიერონ ერი? აქაც მხოლოდ რელატიურ, შედარებით ერთიგეობაზეა ლაპარაკი, და ეს ცხადად სჩანს, როცა ორი სხვა და სხვა ერის ტიპიურ წარმომადგენელს ადარებთ ერთმანეთს. მე ვიტყვოდი, უნდა ვუმაღლოდეთ გამჩენს, რომ ერთი ადამიანი მეორისაგან განირჩევა და აქედან ერიც სხვა და სხვანაირად რომ განსახიერდება თვითეულში. რატომ? იმიტომ, რომ ეგ არის თავდები განვითარებისა, რომელსაც საფუძვლად ცვალებადობა უდევს, თავის მხრივ, მარადისობის მომასწავებელი.

თუ ერის ერთარსება თვითეული მის შვილში ჰპოვებს თავის განსახიერებას, ცხადია, ამისათვის ადამიანთა საზოგადოებრივი ცხოვრების ძალიან გრძელი ევოლიუცია არის საჭირო და აუცილებელი. მართლაც, როგორ გნებავთ ერმა შეიცნოს თავისი თავი, რაიცა სინამდვილეში მის შვილთა თვითშეცნობას მოასწავებს, თუ უკანასკნელნი ჯერ კიდევ განვითარების დაბალ საფეხურზედ სდგანან? ადამიანი არ შეიძლება გახდეს თავის მშობელი ერის ვნებათა, ზრახვათა, მისწრაფებათა ჭურჭელი, თუ ის არ არის თავისუფალი, სწორუფლებიანი, მომქმედი და შემომქმედი, ერთის სიტყვით, ნამდვილი მოქალაქე.

მოქალაქე სახელმწიფოში ჰპოვებს თავის განსახიერებას,




და ეს კი გულისხმობს, თავის მხრით, იმას, რომ ადამიანთა კოლექტივმა ჯერ სახელმწიფოს ჯადრაკში უნდა განვლოს, სანამ ის ერად იქცევა. სახელმწიფოს განვითარების უკანასკნელი საფეხურია, როგორც დავინახეთ საფრანგეთის მაგალითზე, ხელისუფლების თავისუფალ, სწორუფლებიან მოქალაქეთა კრებულზე გადასვლა. აქ მოხდა სწორედ ნამდვილი ფერისცვალება, სახელმწიფო ერად იქცა, ნაციად, რომელიც ამიერიდან ხელისუფლების, უზენაესი ნებისყოფის მატარებელია.

გამოდის, ამრიგად, სახელმწიფო დედა ყოფილა და ერი მისი პირმშო, პირველი უმფროსია, მეორე კი უმცროსი ხნოვანებით. აი კიდევ ერთი სადავო კითხვა, რომელიც გვემუქრება დავთრის არევას! როგორ შეიძლება სახელმწიფო ერზედ უმფროსი იყოს? განა ენა, ხედავ რომ არ დავასახელოთ, სახელმწიფოს მოვლინებამდი არ აიდგა ადამიანმა, განა ენა არ არის ადამიანთა კრებულს ერად რომ ჰქმნის?

ეს კითხვა, უნდა გამოვტყდე, სამართლიანია, მხოლოდ თავის ადგილზედ არ არის დასმული. მართლაც, მე ლაპარაკი მაქვს სოციოლოგიურ ფენომენზე, აქ კი ანტროპოლოგიურ ფენომენზე ჩამოგვიგდეს ლაპარაკი. თავის თავად ეს მსჯელობაც ძალიან სასარგებლოა, მაგრამ იგი უფრო დახელოვნებულებს უნდა დავუთმო ამ დარგში. წამიკითხავს, რომ ცხოველებსაც აქვთ ერთგვარი თავისი ენაო, განსაკუთრებით პრიმატებს, პირველყოფილი ადამიანის მახლობელ ნათესავეებს, „ოთხხელა“ მაიმუნებსო.

სახელმწიფო აბა უენოდ როგორ შეიძლება წარმოვიდგინოთ? უენოდ ოჯახიც, გვარიც, თემიც წარმოუდგენელია. ყველა მათ, ენის გარდა, აქვთ ზნე-ჩვეულება, ცრუმორწმუნობა, ჰყავთ ღმერთებიც, მაგრამ არიან ისინი ამიტომ ერი? არა, რა თქმა უნდა. ჯერ მათ უნდა განვლონ ველურობის, ბარბაროსობის, მონობის, ბატონ-ყმობის, ქვეშევრდომობის მთელი სუსხი, იგემონ ხელისუფლების ძალმომრეობა, უუფლებობა, შეალიონ მასთან ბრძოლას უთვალაენი თაობანი,



რომ ბოლოს მოქალაქობრივობის საფეხურზე ავიდნენ უფლებ-
ბრივ სახელმწიფოში და შემდეგ თვით იქცნენ ბატონი და პატ-
რონი „თავის სახლში“, განურჩევლად, არიან ისინი პატარა
თუ დიდი ერნი, ნაციები.

მაშასადამე, ანტროპოლოგიურად ადამიანთა ჯგუფური
არსებობა, მათი ენა და სხვა თვისებანი, რაიცა წარმოადგენს
ერის ჩანასახს, რასაკვირველია, სახელმწიფოზე ადრინდელი
შოვლენაა, ამ აზრით შეგიძლიათ ერი სახელმწიფოს უმფრო-
სად დასახოთ, მაგრამ სოციოლოგიურად წინაუქმოა მართალი,
როგორცა ვსთქვი.

იტყვიან შემდეგ: კეთილი, ფრანგთა სახელმწიფო მხო-
ლოდ დიდი რევოლიუციის პროცესში გარდაიქმნა ერად, მაგ-
რამ განა არ არიან ხალხნი, ვისაც სახელმწიფო სულაც დაუკ-
რგავთ და თავის თავი მაინც ერთად მოჰქონდათ? იყვნენ
უთუოდ და ამის დასამტკიცებლად მარტო პოლონეთიც საკ-
მარისია, როგორც მაგალითი. პოლონეთი, მართლა, საფრანგე-
თის დიდი რევოლიუციამდე გაინაწილეს მეზობლებმა, დაემ-
ხო, როგორც სახელმწიფო, მაშასადამე, მის შეილთა ბრძოლა
ეროვნული თავისუფლებისათვის ამ დროიდან დაიწყო.

ესლა მე გეკითხებით: განა ამ ისტორიაში თვით მისი ახსნაც
არ ტყრდება? პოლონეთი სახელმწიფო იყო, დაამხვეს გარე-
შე მტრებმა — საფრანგეთს მხოლოდ დაემუქრენ — რაა გა-
საკვირი, რომ პოლონელებმა კიდევ უფრო მწვავედ იგრძნეს
საკუთარი სხეულის სამად გაპობა, დაკარგულის დაბრუნების
აუცილებლობა, შეიცვნეს თავი ერთ სახელმწიფოდ, ერთი ერ-
ად? ნუ დაივიწყებთ, დამოუკიდებლობის დაკარგვის უმთავ-
რესი, თუ არა ერთად ერთი, მიზეზი ის იყო, რომ, როგორც
მათივე ისტორიკოსები გვეუბნებიან, პოლონეთი ჯერ კიდევ
არ იყო უფლებრივი სახელმწიფო, დიდი ფეოდალები და
წვრილფეხა შლიახტა ერთმანეთს ებრძოდნენ, სეიმის ვეტო, —
non possumus, — შეუძლებლად ხდიდა სახელმწიფოს გან-
მტკიცებას და მის საზღვრების დაცვას. ხალხი, გლახობა?
წყვედიადში, უუფლებობაში იღრჩობოდა. განა რუსის დეს-

პოტებმა ხელზე არ დაიხვიეს ეს გარემოება და, სანამ რუსეთში გააუქმებდნენ ბატონ-ყმობას, პოლონეთს არ მოახვიეს იგი ზევიდან, გლახთა ასამხედრებლად ბატონების წინააღმდეგ, ერის შიგნიდან გასაპობად?

სხვისგან ჩაგრული ხალხი, თუ ვინდ ჩამორჩენილიც — პოლონეთი ხომ რუსეთზე მაღლა იდგა კულტურულად — უფრო ადრე შეიცნობს თავის თავს ერად, ვინემ დაწინაურებული, სხვის ბატონობისგან თავისუფალი ხალხი. აღსანიშნავია მეორე მოვლენაც: ჩაგრულ ერში სოციალური ბრძოლა შიგნით სუსტია შედარებით ეროვნულ ბრძოლასთან გარეთ, ე. ი. მჩაგვრელ ერთან; სულ წინააღმდეგს ვხედავთ თავისუფალ ერში, აქ სოციალური ბრძოლა სჭარბობს ეროვნულს. ან კიდევ სხვა სიტყვებით, პირველ შემთხვევაში ეროვნული მომენტი სჭარბობს კლასობრივს, მეორე შემთხვევაში წინაუკმო კლასობრივი — ეროვნულს.

პოლონეთი ერთად ერთი მაგალითი არ იყო. ბევრი იყო სხვაც, არის დღესაც. და ყველა ეს გვეუბნება, რომ ჩაგრული ერი ეძებს დამოუკიდებლობის აღდგენას. რაა დამოუკიდებლობა თუ არა სახელმწიფოებრივობა? ერი თავისთვის იჩემებს ხელმწიფებას, უზენაეობას, ხოლო ხელმწიფება — უზენაესობა ფუჭი სიტყვებია უხელისუფლოდ. ხელისუფლება კი გულისხმობს ორგანოებს სახელმწიფო მართვა - გამგეობისა. ამრიგად, თუ წინეთ ვამბობდი სახელმწიფო იქცა ერადო, ენლა ვამბობ: ერი უნდა იქცეს სახელმწიფოდ. შესძლებს თუ არა ამას ჩაგრული ერი? ზოგმა, შეიძლება, სულაც ვერ შესძლოს, დამოკიდებულია დროსა და ადგილზე, და ამ შემთხვევაში მას მიწიდან აღგვა მოელის... და სწორედ ამის შიშით ყოველი ერი სტიქიურად ესწრაფვის დამოუკიდებლობას, სახელმწიფოებრივობას. დიდი სიბრძნეა, თუ არა მეტი, როცა იტყვიან ესა და ეს ხალხი ერიაო, თუ ის სახელმწიფო არ არის, ან არ ლამობს სახელმწიფოდ ქცევას.

მაგრამ აქ შეიძლება შემაჩერონ: რამდენია შემთხვევა, რომ ამა თუ იმ ხალხს სახელმწიფო სულაც არ ჰქონებია და-



საბამიდან და მაინც ეროვნებად იქცა, ან არის ამ გარდაქმნის პროცესში! ესეც მართალია, შორსაც არაა წასასვლელი, გაიხსენეთ ბალტიის ზოგიერთი რესპუბლიკა, საბჭოთა მრავალი ხალხოსნები, უალფაბიტო, უკულტურო, მომთაბარე, ძალზე ჩამორჩენილი. სწორედ ამათ ეძახიან უისტორიო ეროვნებათ ან ხალხებს. რატომ უისტორიო? იმიტომ, რომ თავისი სახელმწიფო არ ჰქონიათ, სხვა განსაზღვრა არ არებობს.

ეს ხალხნი და ხალხოსნები, ყოველ შემთხვევაში, რუსეთის მფლობელობის დროს იწყებენ ფეხის ადგმას, იფშენეტენ თვალებს და თან და თან თვითცნობიერების პროცესში შედიან. მათ არ ჰქონიათ წარსულში სახელმწიფო, მაგრამ, ცხოვრობენ რა დამპყრობ სახელმწიფოს ფარგლებში, ხელისუფლება მათზედაც ახდენს თავის გავლენას, მით უფრო, რომ ის უცხოა და, როგორც ასეთი, გარდა სოციალური ჩაგვრისა, სდევნის მათ ენას, სარწმუნოებას, ზნე-ჩვეულებას და სხვ. განმანთავისუფლებელ ბრძოლაში ცარიზმის წინააღმდეგ ისინიც იღებენ მონაწილეობას, ისტორიულ ერებთან ერთად, და ზოგი მათგანი, სახელდობრ ბალტიკაში, უკანასკნელთაც კი უსწრებენ მოქალაქობრივ და აქედან ეროვნულ სიმწიფეში. სხვები, წვრილი ხალხოსნები, დღესაც ვერ მიღწეულან ამ ხარისხს განვითარებისა და საბჭოთა დესპოტიის ქვეშ დაჩქარებული ტემპით მიემართებიან გაეროვნებისაკენ. ცხადია, მაშასადამე, სახელმწიფოებრივობას, თუ გინდ მჩაგვრელი ერისა, ამ შემთხვევაშიც უთამაშნია და თამაშობს დიდ როლს.

საყოველთაოდ აღიარებულია, რომ მე-19-ტე საუკუნე ერთა განთავისუფლების ხანა იყო ევროპაში. აიღეთ ბალკანეთის სამეფონი, რომელნიც მკვდრეთით აღდგენ ოსმალის მრავალ საუკუნეთა ბატონობისგან. მათ შორის საბერძნეთი მოუსვენრად თხრის დაბა-ქალაქებს, რომ აღადგინოს ანტიური თავისი დიდება. რა უნდა ვსთქვათ ერთ ენაზე მოლაპარაკე იტალიურ და გერმანულ სახელმწიფოებზე, რომელნიც მე-19-ე საუკუნის მეორე ნახევარში გაერთიანდენ გარიბალ-



დი-კავურის თუ ბისმარკის მეთაურობით, და უკანასკნელმა ხომ რკინით შექმნა ის.

აიღეთ ეხლა ამერიკის დიდი თუ პატარა რესპუბლიკები, ამათი წარმოშობაც ხომ ცნობილია. ისპანიის, პორტუგალიის, ინგლისის ახალშენები, უკვე ძველ სამშობლოში საკმაოდ დაწინაურებულნი, თან და თან შეიცნობენ თავს ცალკე ერებად და გადაიგდებენ მეტროპოლიის უღელს, თუმცა იმავე სისხლხორცისა და ენისა. მე არ ვამბობ ფრანგებზე, იტალიელებზე, გერმანელებზე, ებრაელებზე, უკანასკნლად სლავიანებზე, რომელნიც მილიონობით სახლდებოდენ იმავე ამერიკაში და იღებდენ არა მარტო მოქალაქობრივობას, არამედ ენასაც, ე. ი. ეროვნულად ითქვიფებოდენ. ამერიკაში აქა-იქ ზანგებიც იღებენ აქტიურ მონაწილეობას სახელმწიფოს შექმნაში, მხოლოდ თავის ენას სრულიად ივიწყებენ და ითვისებენ ევროპიულ ენებს.

აფრიკაშიც გაჩნდა ზანგთა ერთი ახალი რესპუბლიკა ლიბერია; ეთიოპია კი, რომელიც თავის ჩამორჩენის მსხვერპლი გახდა, ძველი ეგვიპტის ტოლია ხნოვანებით. დღევანდელი ეგვიპტეც თბრის, რაც შეუძლია, რომ დაამტკიცოს თავისი ნათესაობა ფარაონებთან. ამოოდ! სამხრეთ აფრიკაში ბურების, ჰოლანდიის ახალშენების, ომი ეხლაც ახსოვს ბევრ ჩვენგანს, და მათი ღირსეული ადგილი დიდი ბრიტანეთის Commonwealth-ში თვლსაჩინოა.

მცირე და ცენტრალურ აზიაში ოსმალეთმა და სპარსეთმა ჩვენი თვალწინ შეიცვენეს თავი ერებად, თურქეთი და ირანი ანტიური წარსულიდან ცდილობენ თავის ნათესაობის გამოაშკარავენ. არაბეთის ახალი სამეფონიც, აელანისტანიც მათ კვალს მისდევენ. ბუხარა-ახივა, ჯერ კიდევ ცარიზმის „მზრუნველობის“ ქვეშ, გაიყინა ფეოდალურ არტახებში და მით უფრო ადვილად გადააყლაპა ის რუსეთმა, ისე როგორც მთელი თურქესტანი, და მხოლოდ დღეს ვამჩნევთ ამ ვეება ტერიტორიაზედ მძლავრ ეროვნულ მოძრაობას.

რა უნდა ითქვას ინდოეთზე, ჩინეთზე, შორეულ აზიაზე?

რამდენი ღირსშესანიშნავი, საეპოქო ამბები ხდება იქ, რამდენ სიურპრიზებს უმზადებენ ისინი ეგრედ წოდებულ განათლებულ კაცობრიობას მომავალში!

ეს უბრალო აღნუსხვა სახელმწიფოთა და ერთა, რომელიც სრული არაა, გვიმტკიცებს, რომ მე-20-ე საუკუნე არა ნაკლებ, ვინემ მე-19-ე, იყო და იქნება გაელენთილი ეროვნებათა ბრძოლებით დამოუკიდებლობისათვის, ან კიდევ ნახევრად დამოუკიდებელ სახელმწიფოების გაეროვნებისათვის.

ზევით თქმულთან დაკავშირებით, ცალკე ადგილი უნდა დაეთმოს სამ-ენიან შვეიცარიას, ამ უალრესად საინტერესო და ბევრში მისაბაძავ სახლმწიფო — სხეულს. მიუხედავად მიღებული ტერმინისა — *de la nationalité suisse* — შვეიცარიის ხალხი მაინც არ წარმოადგენს ერთ ერს და მხოლოდ სამი დიდი ერის ნატეხებისაგან შესდგება. და თუ საუკუნოები მისი მთლიანობა მაინც დაცულია და მომავალშიც იქნება დაცული, ამის მიზეზია ორი გარემოება: ერთი, მხრით, სახელმწიფოს კონფედერატიული, უკეთ—ფედერატიული ფორმა, მეორეს მხრით, გეოგრაფიული მდგომარეობა. შვეიცარია ერთგვარი ნეიტრალური ზონაა, გაყოლებული გერმანიასა, საფრანგეთსა და იტალიის შუა და ეს იყო გამოსავალი წერტილი შვეიცარიის ნეიტრალიტეტის საერთაშორისოდ ცნობისათვის.

რამდენადმე იმავე როლს თამაშობს ბელგია საფრანგეთსა და გერმანიას შუა, დასახლებული ვალონებით და ფლამანებით, ამიტომ ნეიტრალურიც იყო 1914 წლამდე.

ეს გამონაკლისები, თავის თავად გასაგები, მხოლოდ საერთო წეს ადასტურებს: სახელმწიფო აკვანია ერისა და ერიც, რომ იცოცხლოს და არ მოკვდეს, სახელმწიფოს ჯავშანს ისხამს.

ჩვენი წარსულიდან

მე არ ვიცი, როდის შემოვიდა სიტყვა „ერი“ ხმარებაში. საბა სულხანი განმარტავს თავის ლექსიკონში, რომ ერი „მსოფლიო კაციაო“, ხოლო საერო „ერისგანთათვის“ ნიშნავსო, ალბათ განსხვავებით სასულიეროსაგან. იმავე ლექსიკონში წაიკითხავთ „ერისთავი“ და მის განმარტებას — „ჯარის-თავი“, მაგრამ სიტყვებს „ეროვნება“, „ეროვნული“ იქ ვერ იპოვით.

ამ რიგად, თითქო ცხადია, რომ ერი თანამედროვე გაგებით სულ სხვა რამეა, ვინემ საბა მასში გულისხმობდა, სახელდობრ ნაცია, ფრანგულიდან nation, რომელიც, თავის მხრით, მიგვიითითებს ლათინურ natio-ზე და ეს კი მაჩვენებელია დაბადების (natus) ადგილის.

რამდენი კიცხვა გვსმენია, როცა ვისმეს წამოცდებოდა, ხოლმე, ქართველი ერი ერთი საუკუნეა რაც დაიბადაო! როგორ! მაშ წინეთ რალა ვიყავით? — შეუტევედენ. ვიყავით სახელმწიფო, უკეთ — სახელმწიფონი საუკუნეთა გასწვრივ, მაგრამ ერი არ ვიყავით—აი პასუხი. რა თქმა უნდა, ადგილი, ხალხი, ენა ერთი იყო. ჩვენ ვამაყობთ მით, მაგ., რომ მე-12-ე საუკუნის ვეფხის-ტყაოსანი ეხლაც გვესმის, თუმცა ზეპირად უკვე ვერ ჩავაბუღებულვებთ მის მშვენიერ ტაეპებს, როგორც ოდესმე. მაშასადამე, გაცილებით ადრე უნდა ვქცეულიყავით ერად, მაგრამ ამას ხელი შეუშალა მონღოლების შემოსევამ, ფეოდალიზმმაც.

ზედმეტია შეჩერება იმაზე, რამდენ გრიგალს გადაუქროლავს ქართველთა თავზე, რამდენი ომი, წუთიერი გამარჯვება და ხანგრძლივი მონობა გამოგვიცდია, რამდენი გავლენა



გარედან ქვეყნის სხვა და სხვა ნაწილებზე... როცა ეცნობი ამ ისტორიას, ტრადიკულ ისტორიას, გიკვირს, ოცდები, ნუ თუ კიდევ არის სხვა უფრო დიდი სასწაული, ვინემ ქართველობის ფიზიკურ-სულიერი გადარჩენა ამ დიდ ჯვარადინა შარა-გზა-ზედ, სადაც ამდენ მრისხანე დამპყრობს გაუვლია ცეცხლითა და მახვილით, სადაც ამდენ სხვა მოღვამათა სახსენებელიც კი გამჭრალა დროთა ბრუნვაში!

მეორეს მხრით, ქართველობა, დანაწილებული წოდებრივად: ბატონი და ყმა; გეოგრაფიულად: სხვა და სხვა კუთხის საერისთავო, — ეს ქართველობა კიდევ არ არის ერი, თუმცა უნდა ითქვას, ის უბრალო გაბნეული ბრბოც არაა, არამედ ერთგვარი მთლიანი ერთეული თვითეულ კუთხეში ერისთავის ხელისუფლების ქვეშ. ერისთავნი სხვა და სხვა გვარისა და ხარისხის თანასწორნი არ არიან, ერთი ძლიერია, მეორე — სუსტი, მაგრამ არის ერთი, რომლის წინაშე ისინი ქედს იხრიან, ნომინალურად მაინც: მეფე, ხელმწიფე. რა აკავშირებთ მათ? თქვენ იტყვიან: ერთი სისხლი, ერთი ენა... ერთი სარწმუნოებაც, შეგიძლიათ დაუმატოთ, რადგან საშუალო საუკუნოებში ეს ნიშანი უფრო სჭრიდა ძალთა გასაერთიანებლად გარეშე საშიშროების წინაშე. მაგრამ ყველა ეს არ იყო იმ დროს ისე ცხადი, როგორც დღეს, სჭარბობდა ძალა, ძალმომრეობა. ფეოდალები განუწყვეტელ ქიშპობა-ომებში იმყოფებოდნენ ერთმანეთთან. ერთი სისხლის, ერთი ენის, ერთი სარწმუნოების ბატონები და მათი ყმები ერთგულად ქლევდნენ, სრავდნენ, აოხრებდნენ ერთმანეთს. იმარჯვებდა უფრო ძლიერი და ავრცელებდა უფრო სუსტზე თავის ბატონობას, ხელისუფლებას. ეს ისე ცხადი იყო ყველასათვის, რომ ძალის წინაშე მუხლს იდრეკდნენ, მისი ეშინოდათ, აქედან შოთას სიტყვები: „შიში შეიქმს სიყვარულსა“.

არც მეფე ჰყავდათ ერთი ქართველებს მე-13-ე საუკუნიდან, საქართველო დაიყო სამეფო-სამთავროებად (ეს ორი ერთეული უფრო დიდია სივრცითა და მნიშვნელობით, ვინემ საერისთავო) და ზოგიერთი სამთავრო მთლად მოსწყდა დე-

და-ტანს, რჯულიც კი გამოაცვლევენეს. როგორ გნებავთ ასეთ პირობებში ერთი ერი? მაგრამ ეს არ ნიშნავს, რა თქმა უნდა, რომ ის ელემენტები, ასე ვსთქვათ, თანდაყოლილი ელემენტები: ტერიტორია, სისხლი, ენა არ შერჩათ ქართველებს, რომლისაგან უკანასკნელნი გამოსქედენ ბოლოს და ბოლოს ერთ ეროვნებას, თავს შეიცნობენ ერად. ამას ხელს უწყობდა უთუოდ, უხანგრძლივესი მცირე და წინა აზიაში, ევროპაშიც, ბაგრატიონთა დინასტია, რომლის შტონი ფლობდენ ტერიტორიის უდიდეს ნაწილს. ამას ხელს უწყობდა აგრეთვე მართლმადიდებელი ეკლესია.

აქვე უნდა აღინიშნოს, თუ გინდ განმეორებით, რომ საშუალო საუკუნოებში საერო ანუ სახორციელო მკაფიოდ გამოეყო სასულიეროს და უპირატესობა პირველს მიეკუთვნა. ერისთავი ჩვეულებრივ ერისგანი იყო. აიღეთ, მაგ., ხალხური გამოთქმა ერი და ბერი და სინჯეთ წინაუქმო: ბერი და ერი, როგორ გეჩოთიროთ ყურში!

საქართველოს დანაწილებამდე „ერს“ მეფე უდგა სათავეში, ხოლო „ბერს“ — კათალიკოზი, უპირატესობა პირველის მეორეზე, აქედან საერო-სახორციელო საქმეების სასულიეროზე, უტყუარი ისტორიული ფაქტია. კათალიკოზი ქვეშე ერდომი იყო მეფის, ისე როგორც ერისთავი. ამით თითქო ისახება მორჩილების იდეა მეფის ბრძანების, მისი კანონის წინაშე. მაგრამ ეს არაა დამთავრებული პროცესი, ჩვენმა ისტორიამ არ იცის აბსოლიუტური მონარქია და არც ბიუროკრატია ამ სიტყვების ევროპიული მნიშვნელობით. მართალია, ვკითხულობთ, დავით აღმაშენებელმა შექმნა მუდმივი ჯარი და მისი ბრძანება კანონი იყო ყველასათვისო, მაგრამ თამარ მეფე იძულებული შეიქმნა ისევ დაეთმო ტახტის ზოგიერთი პრივილეგიები აჯანყებულ ფეოდალთათვის, რომელთა ცდა ერთგვარი წარმომადგენლობითი სისტემა შემოეღოთ, უკვალოდ ჩაიარა. არც ვახტანგ მეექვსის კანონმდებლობას შეურყევია, უფრო გვიან, ფეოდალური წყობილება და ერეკლე მეორის მისწრაფება გაევროპიელებისაკენ ფუჭად ჩაიარა. ხელს



უშლიდენ გარშემორტყმული მტრებიც, მუდამ წინააღმდეგ-
ნი საქართველოს გაერთიანებისა და მისი კავშირის დასაველ-
ეთან.

საქართველოს ფეოდალიზმი რუსეთის მფლობელობის
დროს დაიმსხვრა, გაუქმდა ბატონ-ყმობა და ყველანი რომა-
ნოვთა ტახტის ქვეშევრდომნი გავხდით.

მე არ ვიძიებ, რომელია უფრო ხნოვანი, ტფილისი თუ ქალა-
ქი, ორივე სახელს კი უწოდებს ხალხი ჩვენს დედა-ქალაქს. მახ-
სოვს ისიც, რომ დავით სარაჯიშვილი, დიდი პატრიოტი-მრე-
წველი, თავის თავს ამაყად ცფილისის მოქალაქეს უწოდებდა,
და ის მართლა ქალაქელი იყო დაბადებით. გარდა ამისა, ვინა-
იდან ზოგ დაბას ჩვენში დღესაც ახალქალაქი ეწოდება, აშკა-
რაა, მის ადგილას წინეთ ძველი ქალაქი ყოფილა. ამასვე გვე-
უბნება მეგრული ნაქალაქევი. რა მინდა ამითა ვსთქვა? ისა,
რომ ქალაქები ჩვენცა გვექონებია, მაშასადამე, მოქალაქენიც
უნდა გვეყოლოდენ, მაგრამ ამ ტერმინს არ ეძლეოდა კიდეც
პოლიტიკური მნიშვნელობა, უკეთ — ვერ განვითარდა ამ ხა-
რისხამდე და მოქალაქე ქალაქელი დარჩა დაბადებით

ვერც გაბატონებული ხალხი, რუსი იქცა მოქალაქედ,
თუმცა ქალაქები მასაც ბევრი შეუქმნია. გაიხსენეთ მარტო
ძველი ნოვგოროდი და მისი ვეჩე; აშკარაა, რუსებმა უკეთ
დაიწყეს, მოქალაქეობას ერთგვარი პოლიტიკური ელფერი გა-
დაჰკრავს. მაგრამ ნოვგოროდი მოსკოვიამ დაიპყრო, და ყვე-
ლა რუსნი მისი ქვეშევრდომნი გახდენ.

საქართველომ რუსების აბსოლიუტური სახელმწიფოებ-
რივობის ქვეშ ამოყო თავი. ეს აბსოლიუტიზმი, მართალია, უც-
ხო იყო მისთვის, მზავგრელი, გამრუსებელი, მაგრამ მან გააე-
რთიანა ის, ტერიტორია და მასზედ მოსახლე ქართველი ხალ-
ხი, აღირსა მას, შედარებით, ხანგრძლივი შესვენება გარეშე
მტრებისაგან, გაანთავისუფლა ბატონ-ყმობისაგან, როგორცა
ვსთქვი, და გზა გაუხსნა ქვეყნის მოქალაქობრივობის ჩასახვეა -
ზრდას.

არ უნდა დავივიწყოთ, ყველა ეს მოხდა არა ქართველ-

ბისათვის, არამედ რუსეთის საიმპერიო ინტერესების დასაცმა-
ყოფილებლად. უდავოა ისიც, რომ რუსის ბიუროკრატია ცდი-
ლობდა, როგორც პოლონეთში, ხან გლეხების მონადირებას
თავადაზნაურობის წინააღმდეგ, ხან, და ეს უფრო ხანგრძლი-
ვად, თავადაზნაურობის მონადირებას გლეხების წინააღმდეგ.
ერთის სიტყვით, ქართველი ხალხის დიდი მიღწევანი მოქა-
ლაქობრივ სარბიელზედ ხდებოდენ არა მპყრობელთა ხელის
შეწყობით, პირიქით, მათ მიერ ამართულ ათასგვარ დაბრკო-
ლებათა გადალახვით.

რუსის ბობოლა ბიუროკრატებს ჩვეულებად ჰქონდათ
ქართველობა უკვე მობერებულ ხალხად დაესახათ, რომელსაც
თითქო რაღაც ისტორია ჰქონებია, მაგრამ მისი აწმყო და მო-
მავალი უიმედოაო! მათ ბეც თვალებს გამოეპარა, რა ღრმა
სოციალური გარდაქმნები ხდებოდა ხალხის აგებულებაში,
როგორ გაიძრო მან ძველი პატრიარქალური სამოსელი და გა-
ბედულად შეაბიჯა ახალ სამეურნეო და სააღმშენებლო ურთი-
ერთობაში; როგორ იზრდებოდა, ვაჟკაცდებოდა და როგორ
იქცა ის ერთ მშვენიერ დღეს სწორედ მათთვის საშიშარ პო-
ლიტიკურ ძალად.

მე-19-ე საუკუნე იმ ხანად შეიძლება გაიყოს, რომლის მი-
ჯნები ადვილად გამოსაცნობია. პირველი: ძვირფასი საუნ-
ჯის, სახელმწიფოებრივი დამოუკიდებლობის დაკარგვის შეც-
ნობა, მისთვის გლოვა და ზარი, დაბრუნების ცდა შეთქმუ-
ლებათა და აჯანყებათა გზით. მეორე: ამ საშუალებათა უკუ-
გდება და სამაგიეროდ ჩუმი, განუწყვეტელი მუშაობა ხალხის
გამოსფხიზლებლად, მის ძალთა დაზოგვით, დაგროვებით, რა-
თა შესძლებოდა მას მოხდენილ დროს თავისი „მე“ გამოე-
მჟღავნებია და დაეცვა კიდევ.

სრულიად გაუგებარი იქნებოდა, ქართველობა პასიურად
რომ შეხვედროდა რომანოვების უპირობას, ჩადენილს მის სა-
ხელმწიფოებრივი არსებობის წასაშლელად. მას ხომ არა ერ-
თხელ დაუცავს ის საუკუნეთა განმავლობაში, განა მტრის სი-
დიდე, სიმრავლე აშინებდა მას, როცა თავის სიცოცხლეს სას-
წორის ერთ ჯამზე სდებდა? რასაკვირველია, დიდი ერეკლეს

ტრაქტატი, გიორგი მეცამეტის ერთგულობა რუსეთის ტახტსადმი ბორკავდა მას, ხალხი დარჩა უწინამძღვლოდ, განადგურებული, მეტ ნაწილად გაელეტილი, დაღლილი, არაქათ გამოცლილი.... და მიუხადავად ამისა, მან მაინც ამართა თავისი დაფლეთილი საომარი დროშა. დამარცხდა, მართალია, სხვაგვარ შეუძლებელიც იყო, მაგრამ თავისი სახელი და ღირსება უმწიკვლოდ გადასცა შთამომავლობას.

შეცდომა და კითხვისადმი არა - ისტორიული მიდგომა, როცა ამბობენ, ვითომ ბატონიშვილები და თავადები მარტო თავის დინასტიურ თუ სხე უპირატესობათა აღსადგენად იბრძოდნენ და ამიტომ დამარცხდნენ. ივიწყებენ, რომ ბატონიშვილები და თავადები იგივე ფეოდალები იყვნენ, მფლობელნი მამულთა და მოსახლეობის, აქედან, მათი მაშინდელი წარმოდგენით, დინასტიისა და პრივილეგიების აღდგენა იმავე დროს ქვეყნის განთავისუფლებას უდრიდა გარეშე მტრისაგან. განა ერეკლემაც ჩასწერა ტრაქტატში თავის დინასტიის სამუდამოდ შენახვა, მაგრამ ამით ის ფიქრობდა საქართველოს უფლებათა უზრუნველყოფას.

ივიწყებენ, მეორეს მხრით, იმასაც, რომ ხალხი, გლეხობა ჯერ ისევ ძველი ფეოდალური განწყობილების ტყვე იყო; ის სჩივოდა თავის პეტრიციებში სწორედ ამ განწყობილების ერთი ორად გაუარესებას უცხო მოძალადეთა წყალობით. აქ არეული იყო ერთმანეთში წოდებრივი და სოციალური მოტივები, საიდანაც ერთი რამ ცხადი იყო ყველასათვის: გარეშე ძალა იყო მათი ნივთიერი მდგომარეობის გაუარესების მიზეზი, რასაც ზედ დაერთო მათი ზნე-ჩვეულების შელახვა.

საინტერესოა, ბრწყინვალე თავადები, ისინიც კი, ვინც 1832 წლის შეთქმულობა მოაწყო, რუსეთიდან შინ დაბრუნებულნი, აქტიურ მონაწილეობას იღებენ აზერბეიჯანის სახანოთა, შემდეგ მთიელთა დამორჩილებაში. მათ შორის პოეტებიც იყვნენ, პატრიოტნი. ამბობენ, ისინი შურს იძიებდნენ „ლეკებზე“ მათი სამშობლოს დარბევისათვის წარსულში! შეიძლება, მაგრამ რატომ ვერ ამჩნევდნენ ისინი ქართველი

გლებების გაუგონარ დარბევას, ამ გალაშქრებათა დროს, რუსის მხედართა მიერ — ეს სხვა კითხვაა.

ასე თუ ისე, სუფრულმა მამულიშვილობამ თავისი დრო მოჰკამა, დგება მეორე ანუ ილია და აკაკის ხანა. ამ ორ დიდ პიროვნებას თავისი წინამორბედნი ჰყავდათ, რა თქმა უნდა, ისე როგორც თანამედროვენიც. მწერლობაში სჭარბობს მოქალაქობრივი და ეროვნული მოტივები, და ესენი მჭიდროდაა გადაბმული რუსეთისა და დასავლეთ ევროპის რევოლუციურ, განმათავისუფლებელ იდეებთან. ქართველი ხალხი და მისი მომავალი, ყოველ შემთხვევაში, მთელი მწერლობის მამოძრავებელი ძარღვია.

ქართველობა უკვე არაა ხალხი, ისაა ეროვნება თავისი განსაკუთრებული იდეალით, რომელსაც ჯერ მხოლოდ დედა დამღერის აკვანზე თავის შვილს, შემდეგ თვით ხალხს იპყრობს და ბოლოს ბორკილების დამსხვრევ თილისმად იქცევა.

ქართველი არ ეტყევა ქვეშევრდომის პერანგში, მოითხოვს ადამიანისა და მოქალაქის უფლებას, საიდანაც ერთი ნაბიჯია ერის უფლებების მოთხოვნამდე, და სიტყვიდან საქმეზე გადადის. იწყება ხალხის პოლიტიკური დარაზმვა, მისი სცენაზე გამოსვლა... ჩვენ უკვე მე-19-ე საუკუნის მიწურულში ამოვყევით თავი.

ხალხი სცენაზედ

ხალხის თავისუფალი, ე.ი. ნებაყოფილებითი პოლიტიკური დარაზმვა სხვა სახისა და ფორმის, გარდა პარტიულისა, ჯერ არავის გამოუგონია. საქართველოშიც იგივე მოხდა სრულიად ბუნებრივად და ეგრედ წოდებული მესამე დასი გარედან მობერილი და მეტხორცი ორგანიზაცია როდი იყო, როგორც ბევრსა ჰგონია, არამედ ქართველი ერის, საქართველოს საერთო ვითარების პირმშო. მას თავისი დოქტრინაც ჰქონდა უთუოდ — მარქსიზმი — მაგრამ რამდენია მაგალითი, რომ ამა თუ იმ ქვეყნის პარტიებს უცხოეთიდან ვადმოელოთ იდეები თუ მთელი სისტემა იდეებისა? და განა დასელებს ქართველ მეოთხმოციანებში, თვით მესამოციანებშიც არა ჰყავდათ წინამორბედნი, ვინც რუსულ ლიბერალურ-ნაროდნიკულ თუ ხალხოსნურ-ტეტიურ აზროვნებას ეტრფოდა? მათ პარტია არ შეუქმნიათ, მართალია, მაგრამ ამაში იყო სწორედ დასელების უპირატესობა: მათ გადადგეს პირველად ეს ნაბიჯი და მით საქართველო დაწინაურებული ქვეყნების ფერხულში ჩააბეს.

მაგრამ, შეიძლება ითქვას, დასელებმა პირველი დღიდანვე გაარღვიეს მარქსიზმის სპეციფიური წრე: გადაიტანეს თავისი მუშაობა მთელს მშრომელ ხალხზე, გლეხობაზე, მოსახლეობის დიდ უმრავლესობაზე, თუმცა ისიც უნდა დაემატოს, რომ „პროლეტარიატი“ ბოლომდის მათი უცვლელი ფალანდი დარჩა! მე გამიგონია ანეკდოტის მზგავსი ერთი დიალოგი, რომელსაც სინამდვილეში ჰქონდა ადგილი ქ. სოხუმში 1905 წელს. ერთი გლეხი დედა-კაცი, შარვაშიძის მამული-

დან, ეუბნება თავის შვილის ნათლიას, ეგეც მეგრელ სოფლაგ-
რის მეუღლეს: ნეტავი „პრალატარატი“ ვიყო; ჩემს ბედს
ძალი არ დაჰყეფდა! შე დაკარგულო — უბასუხებს ნათლია
— პროლეტარიატი ხარ (ეგ კარგად გამოსთქვა, ხოლო მეო-
რე სიტყვა პროლეტარი მანაც არ იცოდა) აბა რა ჯანდაბა,
ცალი ხარის მეტი არაფერი გაგაჩნია, ეზო ვერ დაგიხნავს და
არც კი იცი მემამულე როდის აგყრის!

დასელები პროლეტარიატის სახელით შედიან ფართე მა-
სებში, ხოლო 1905 წელს ისინი უკვე სოციალ-დემოკრატიე-
ზად გვევლინებიან, რომლებსთვის დემოკრატია უებარი სა-
შუალებაა სოციალური მიზნების მისაღწევად. ეს იქიდანაც კა-
რგადა სჩანს, რომ ისინი გლეხების კერძო საკუთრებას იცა-
ვენ და ამით ამარცხებენ იმავე რუსეთის გავლენის ქვეშ მყოფ
ანტიმარქსისტ სოციალისტებს!

აი, როგორ იქცა სოციალ-დემოკრატია უძლიერეს მახი-
ურ პარტიად ჩვენს ქვეყანაში და ბოლოს ერის შესვეურიც გა-
ხდა. მოპირდაპირენი შენიშნავენ: პარტია კლასთა ბრძოლას
აღვივებდა ხალხში (ძალზედაც „აღრმავებდა“) და მით ლე-
ლო გაიტანაო. ეს მართალია და ქართველი ხალხიც საკმაოდ
ღარიბი იყო ამისათვის, მაგრამ ივიწყებენ, რომ ის ეროვნუ-
ლადაც ჩაგრული იყო, უკმაყოფილო, ოპოზიციური სულით
გაქვლენთილი — აი ის პოზიერა ნიადაგი, რაზედაც „ახალ-აღ-
თქმის“ თესლი ეცემოდა, ამოდიოდა და ჯეჯილდებოდა.

ამ რიგად, სოციალ-დემოკრატია პირველი იყო, ასე ესთ-
ქვათ, დასაბამიდან, რომელმაც სცენაზე გამოიყვანა ხალხი,
გამოაფხიზლა, დარაზმა, აამეტყველა... ერთის სიტყვით, შექ-
მნა ნამდვილი ხალხური პოლიტიკური მოძრაობა. გაიხსენეთ
1905 წელი: ქართველი ხალხი მწყობრად, დარაზმულად გა-
მოვიდა; ეს არ იყო წუთიერი ჯანყი, რუსული ბუნტი; ხალ-
ხმა გაიმარჯვა კიდეც, მოიწადინა თავის თავის პატრონობა,
მაგრამ რევოლიუცია დამარცხდა შიდა რუსეთში და აქედან,
დამარცხდა იგი საქართველოშიც. ზედმიწევნით საგულისხმი-
ეროა, რა დასკვნა გააკეთა ქართველმა ხალხმა, შეაქცია თუ



არა მან ზურგი იმ პარტიას, რომლის წინამძღოლობით მწიგნობრე დამარცხება იგემა? არა! მისი ერთგული დარჩა, ატარა ის თავის უბეში სუსხიან რეაქციის დროს და 1917 წელს ისევ მას გაყვა, ეხლა უკვე ერთი საუკუნის წინ დაკარგული თავისუფლების აღსადგენად!

მოპირდაპირენი არ სცხრებიან: კი, მაგრამ სოციალ-დემოკრატიათმ თაჱიდანვე არ ჩაიწერა თაჱის პროგრამაში ჭვეყნის დამოუკიდებლობათ. ადვილი სათქმელია, დამოუკიდებლობათ! მაშინდელ პირობებში ეს შეუძლებელი იყო. რით აიხსნება, რომ მე-60-ე და მე-80-ციანებშიც სწორედ ასე იქცეოდენ, განათ მათ აკლდათ ერთგულობათ ერისადმი? განათ ჩვენ ყველანი მათი მოსწავლე არათ ვართ? განათ ტყუილათ გეიტაცებდენ ილიათ და აკაკი, მოჩხუბარიძე და ვაჱათ? არათ, რასაკვირველიათ, მაგრამ გრძნობასთან ერთად გონებაც მუშაობდა: ქართველი მოღვაწენი კარგად გრძნობდენ, რომ ყველაფერს თაჱისი დრო აქვს, ეროვნული საკითხის პოლიტიკურად დასმა, ხალხის დამოუკიდებლობის დროშის ქვეშ მოწოდება განუზომელ ხიფათს წარმოადგენდა მაშინ პატარათ ერისათვის. გაიხსენეთ, პოლონეთი დიდი ერიათ, მაგრამ იქაც არ გამოქონდათ, მე-19-ე საუკუნის მიწურულიდან დიდ ომამდე, დამოუკიდებლობათ, როგორც სადღეისო პლატფორმა.

სამაგიეროდ, ბევრი იყო სხვა საჭირობოროტო კითხვები, რომლის ირგვლივ უფრო ადვილად შეიძლებოდა, შედარებით, ხალხის დარაზმვა; და ეს კითხვები, პირველ რიგში, ხალხის სოციალ-ეკონომიურ ჭირ-ვარამს ეხებოდა. სოციალ-დემოკრატია მედგრად იბრძოდა ამ ნიადაგზედ, მსხვერპლიც დიდი გაილო — მოპირდაპირენიც ვერ უარყოფენ ამას — და მარქსიზმიც, თუ გნებავთ, მისწრება იყო ამ ბრძოლაში.

მაგრამ ჩაგრულ ერში შეუძლებელი იყო სხვა კითხვებიც არ წამოჭრილიყო, როგორიცათ, მაგ., ენის, განათლების (რუსიფიკაცია), ეაქრობა-მრეწველობის შებოროკვის, უცხო ელემენტების ჩამოსახლების, უფლებრივი უთანასწორობის — ჩვენ ხომ „ტუზემცები“ ვიყავით! სოციალ-დემოკრატია არათ



ნაკლებს ენერგიით ებრძოდა ეროვნულ ჩაგვრა - **უსამართლო**
 თლობას, ვინემ სოციალ-ეკონომიურ სიდუხჭირეს.

La politique de moindre résistance! — შემოგვძახებენ —
 და მართალიცაა, მხოლოდ არა მარტო სოციალ - დემო-
 კრატებზე, არამედ პატრიოტებზეც, რომელნიც მათ აღრე გა-
 მოვიდენ ასპარეზზე. სოციალ-დემოკრატია სეპარატიზმის წი-
 ნაალმდეგიაო — მოახსენებდენ რუსეთის მეფეს მისი ნაცვალ-
 ნი ტფილისიდან. ეგეც მართალია, მერმე? გამართლდა მათი
 პროგნოზი? არა, არ გამართლდა: როცა დრო დადგა, სწო-
 რედ სოციალ-დემოკრატიათ ააფრიალა, სხვა პარტიების გარს-
 შემოკრებით, დამოუკიდებლობის დროშა.

სოციალ-დემოკრატია რევოლუციური პარტია იყო, მან
 ომი გამოუცხადა თვითმპყრობელობას და ხალხსაც ამისათვის
 რაზმავდა. ის ეუბნებოდა მოქიშპე პარტიებს, მის შემდეგ რომ
 გაჩნდნენ: ამოა თქვენი ცდა უშველოთ ერს, როგორც ასეთს,
 სანამ თვითმპყრობელობა ბატონობს. ქართველმა ხალხმა იგ-
 რძნო, შეითვისა კითხვის ასე დასმის სისწორე. არაა სხვა სა-
 შუალება, რომელსაც ისე მძლავრად შეეძლოს ხალხის მონა-
 დირება, მისი აღტყინება, როგორადაც არსებული ვითარების
 რეალისტურად დასახვა.

მაგრამ იყო ერთი პარადოქსიც, რომელსაც გვერდს ვერ
 აუვლი, თუ გინდ მოპირდაპირენიც კი სდუმდენ მის შესახებ.
 ქართველი სოციალ-დემოკრატია დამოუკიდებელი პარტია არ
 იყო, ის შედიოდა ძველი რუსეთის ს. დ. პარტიაში, რომლის
 პროგრამა და სტატუტი კანონი იყო მისთვის. ეს მოვლენა
 გამოწაკლის წარმოადგენდა, ამიტომ ვეძახი მას პარადოქსი*).

*) მეორე პარადოქსი ისიც იყო, რომ ქართველი სოციალ
 დემოკრატები „მენშევიკებადაც“ გვევლინებიან, თუმცა ჩვენს
 ქვეყანაში ისინი უმრავლესობას შეადგენდენ პარტიაში. რამ-
 დენად მახინჯი და მავნე იყო ეს სახელწოდება, დღეს აშკა-
 რაა, როცა რუსის მენშევიკები წითელი რუსეთის იმპერიალი-
 ზმის მოსარჩლედ გამოდიან.

ავტ.



რუსეთში ხომ ბევრი ერი იყო, დაწინაურებულიცა და ჩამორჩენილიც, ქართველებთან შედარებით, მაგრამ არც ერთის სოციალ-დემოკრატია არ მოქცეულა ასე, ყველანი დამოუკიდებელნი იყვნენ, ან კიდევ ჩქარა გამოეყვენ რუსის ს. დ. პარტიას. თვით უტერიტორიო ებრაელთა სოციალ-დემოკრატიათა თვისი პარტია დაიარსა — ბუნდი. რაშია საქმე, ვინაა ან რაა ამის მიზეზი?

მარქსისტული იდეოლოგია თავისი „პროლეტარებო ყველა ქვეყნისა...“ უთუოდ ერთ-ერთი მიზეზია, მაგრამ მე მას ვერ მივანიჭებ უპირატესობას. რატომ? იმიტომ, რომ ქართველი ერი ჩაგრულთა კატეგორიას ეკუთვნოდა, შეუძლებელია ამიტომ მარტო იდეოლოგიას, თეორიას, ასეთი დიდი მნიშვნელობა მიეწეროს.

სოციალური და ეროვნული მომენტები მშვენივრად თავსდება ერთსა და იმავე პარტიაში, ხოლო პირველს შეგნებულად, მეორეს შეუგნებლად ატარებდა ქართველი სოციალ-დემოკრატია თავის სასოში.

რატომ მოხდა ეს? განა ქართული მწერლობა, აზროვნება, საზოგადოებრივობა თითქმის მარტო ეროვნული მოტივებით არ იკვებებოდა? დიახ, იკვებებოდა და სწორედ ეს არის მეორე მიზეზიც, წარმავალი, ჩვენებური წრეგადასული პოლემიკით ხელოვნურად წარმოშობილი. ყველანი პატრიოტობდენ, ნაციონალისტობდენ, და ეს ტერმინები ხომ სახელ გატეხილი იყო იმ დროს დასავლეთშიც, — საჭირო გახდა, მაშასადამე, განსხვავება, განცალკევება, რომ სოციალ-დემოკრატებსაც იგივე არ მოსვლოდათ, რაც მეოთხმოციანებს: არ გალესილიყვენ „ბაზალეთის ტბაში“!

მაგრამ უარესიც — და ესაა უმთავრესი მიზეზი: ქართული მწერლობა, აზროვნება, საზოგადოებრივობა ერთობ სუსტი იყო იმით, რომ ის არ სცილდებოდა ინტელიგენტთა ვიწრო წრეს, და ეს სამი ბურჟი წინსვლისა უფრო მოხალისეობას, თითქმის ქველმოქმედებას ემყარებოდა. აიღეთ მაშინდელი პრესა, რა გასავალი ჰქონდა მას, რამდენი კითხულობდა?

მე არ მჭირდება ამ კითხვაზე პასუხის გაცემა, დავასკვნე მხოლოდ, რომ გარემოცულობა, milieu, ან როგორც რუსები იტყოდნენ „სრედა“, ისეთი უნიათო, იმდენად უფესვო იყო, რომ მას არ შეეძლო შეეკრა, შეეხოჭა თავის არტახებში ახლად გამოჩეკილი პირველი პოლიტიკური პარტია. განა ამისათვის არ აუხირდნენ მას მაშინვე? თუმცა ეს კი არაა თავის თავად გასაკვირი, გასაკიცხი, პირიქით! თუ ილია დიდა — და ამაზე ხომ დღეს ორი აზრი არ არსებობს — ეს იმითაც აიხსნება, რომ მან პირველმა ასტეხა განგაში მონოლიტური ქართველი ერის გათიშვის საშიშროებაზე.

მონოლიტური, უდავოდ, მხოლოდ, სავალალოდ, ილიას თავში, მის ოცნებაში, იღუმალ ზრახვებში, უამისოდ მიხი უკვდავი ქმნილებანიც წარმოუდგენელი იქნებოდნენ. სინამდვილე სხვა იყო. ბუმბერაზმა და დაუნდობელმა მტერმა ისე დაასახიჩრა საქართველოს სხეული, ისე დააძაბუნა ქართული სული, რომ პირდაპირ გეშინია უბრალო მოგონებაც, რა დიდი ხიფათის წინ იდგა მთელი ერი. რუსული მწერლობა, აზროვნება, საზოგადოებრივობა პყრობდა მის ინტელექტს, უკეთ — განათლებულ წრეებს. ქართულ ენაზე ხომ არა თუ მაღალი, საშუალო განათლების მიღებაც მიუწოდმელი იყო!

განა მარტო განათლებულ წრეებს? ეხლაც არ დამეიწყნია ის უდიერი პასუხი, რომელიც მე მივიღე, ზაფხულს 1910 წ., ერთი დედა-კაცისაგან შუაგულ ქართლში ჩემ შეკითხვაზე, ასწავლიან თუ არა სკოლაში ქართულს მეთქი: ქართული რისი მაქნისია! მე შენ გეტყვი და არზას დასწერ მაგ ენაზე, ან უთარჯიმნოდ მიმართავ ვისმეს... „ვისმეში“ მოხელეს გულისხმობდა, რა თქმა უნდა, იქნება ქართველსაც კი. სიმახინჯე იქამდის მივიდა, რომ ზოგი გადაგვარებული თავადი რუსულად უწუნებდა პატრიოტიზმს დასელებს, რომელნიც პირველი იყვნენ, ვინც ხალხი პოლიტიკურად აამეტყველა დედაენაზე და მით კარები ფართედ დაულო ქართულ აზროვნებას ყველა მის ფენებში.

რალა გავაგრძელო, რუსული გავლენა უფრო ძლიერი



იყო ქართულისაზე, დასელებიც მის ჯადრაკს მოყვენენ. აიღეთ საქართველოს დედა-ქალაქი ტფილისი, სადაც კავკასიის მაჯაც სცემდა, რა ძალას წარმოადგენდენ იქ ქართველები? განა უფრო სტუმარს არ ემზგავსებოდენ ისინი, ვიდრე მასპინძელს? სტუმარს მღუმარეს, თავჩაქინდრულს, ლანდივით მიმალულს...

სად და რაში იყო ხსნა? მე ვერ ვიტყვი, რომ დასელებმა, შემდეგ სოციალ-დემოკრატებმა, შეგნებულად დააყენეს ეს საბედისწერო კითხვა, მხოლოდ ფაქტი ისაა, რომ მათ გადასკრეს იგი საბოლოოდ. სად? ქართველ ხალხში; რაში? მის სცენაზე გამოსვლაში — აი პასუხი, აბა სცადეთ და უარყავით ეს ისტორიული ფაქტი!

მაგრამ დიდი შეცდომა იქნებოდა, მარტო დასელებისათვის მიგვეწერა ეს დამსახურება. კარგის მოქმელს კარგი გამგონე უნდაო — იტყვიან — ქართველი ხალხიც იგი არ იყო, რაც ილია და აკაკის დროს. ის თავიდან ფეხებამდე ჩაყურყუმალდა ახალ სოციალ-ეკონომიურ მორევში, ქერქი იცვალა, სულიც, ასე წარმოიდგინეთ, ალლო აულო სრულიად არაჩვეულებრივ ახალ ვითარებას. ნინოშვილმა და კლდიაშვილმა ეს უკვე აღბეჭდეს მხატვრულად. მაგრამ ესენი სოფელს დასტრიალებდენ და ტიპიურ გლეხს თუ გაკოტრებულ აზნაურს ამოატივტივებდენ ზედაპირზე. რაც შეეხება ქალაქს, კაპიტალისტს თუ პროლეტარს, მათი ქურუმი არც კი დაბადებულყო, და ისევ უკვე დასახელებულნი და ორიოდ სხვაც ქალაქიდან დაბრუნებულ მუშა-გლეხს თუ ადგილობრივ მევახშეს და ჩაფარს ჩამოანცობდენ ხოლმე თავის კალმის წვეტზე.

პროლეტარი და კაპიტალისტი, ამ სიტყვების პირდაპირი მნიშვნელობით, ჯერ კიდევ არ არსებობდა ქართველობაში, გამონაკლისი მხოლოდ საერთო წესს ადასტურებდა. სულ სხვაა ეგრედ წოდებული წვრილი, ნაწილობრივ საშუალო ბურჟუაზია: ვაჭარი, ხელოსანი, მიკიტანი, მოხელე, მოსამსახურე... ესენი ქართველებსაც გაუჩნდათ.

მიუხედავად ყველა ამისა, რა დიღია, რა ბრწყინვალე ქა-



რთველი მუშის როლი! ის თავს იყრის არა-ქართველთა მრეწველო დარგებში, აგრეთვე სახაზინო მუერნეობაში, რკინის გზაზედ, ნავთ-სადგურებში, დეპოებში.

აი, ამ მუშებში, პირველ რიგში, შემდეგ წვრილ მოხელე-მოსამსახურეებში, ნოქრებში, სოფლის მასწავლებლებში ჰპოვეს დასელებმა უებარი „გამგონე“ და მათის საშუალებით მოფინეს მთელს ქვეყანას თავისი იდეები.

რომ არ დაგვაიწყდეს, იყო აგრეთვე ეგრედ წოდებული უსაქმო, მეტ ნაწილად ნახევრად განათლებული ინტელიგენცია, რომელიც რუსულ მართველობას ცხოვრებიდან გაერიყა და ამით გალიზიანებული დასელების პარტიაში ჩაწერას, ჩქარობდა. საყურადღებოა ისიც, რომ ამ ახალ მიმდევრებში ბევრი იყო წვრილ აზნაურთა და სასულიერო წოდებიდან და, შეიძლება, კიდევ ამიტომ იჩენდენ ისინი ასეთ „ორთოდოქსობას“!

ყოველ შემთხვევაში, კლასობრივი დიფერენციაცია ჯერ კიდევ არ იყო ღრმად გამჯდარი ქართველ ხალხში და მიმდევარნიც, ცოტა არ იყოს, ჭრელ და მერყევე ელემენტებს ბლომად შეიცავდენ. ამიტომ გასაგებია, რომ ქართველი სოციალ-დემოკრატია თავის დასაყრდნობ ძალად მუშათა კლასს აცხადებდა, თუმცა იმ თავითვე შეუდგა ის, როგორც ზევითა ვსთქვი, ამ კლასის გლეხობასთან გადაბმას, მათ გაერთიანებას ერთ მებრძოლ ფრონტში, რითაც დიდად განსხვავდებოდა რუსეთის ს. დ. პარტიისაგან, რომლის განუყრელ ნაწილს თითქო ის შეადგენდა.

მაგრამ სოციალ-დემოკრატის მარტო ქართველ მუშასთან როდი ჰქონდა საქმე საქართველოში, და ეს არის მეორე მთავარი მიზეზი, თუ რატომ ვერ გამოეყო ის რუსულ პარტიას. ბლომად იყვნენ რუსის და სომხის მუშები, რომელნიც აქა-იქ სწარბობდენ კიდევ ქართველ მუშებს. რა პოლიტიკის დაქერა შეიძლებოდა მათ მიმართ? ერთი იყო ნაციონალისტური და თითქო ამას უკარნახებდა სოციალ-დემოკრატის მთელი გარემო ვითარება: რუსის მართველობა რუს მუშას

მფარველობდა ჩვეულებრივ, ამლევედა მას უპირატესობას ამრავლებდა მის რიცხვს; მაგრამ სომხის მუშისადმიც მეტ ლმობიერებას იჩენდა ის, გასაგებია რატომ — დაეპირდაპირებია ქართველი მუშისათვის, გამოეწვია მათ შორის ეროვნული შუღლი. უამისოდაც კერძო მრეწველობა ხომ სომხების ხელში იყო, პირველ რიგში, და ესენი, რასაკვირველია, თავის ეროვნების მუშებს ამჯობინებდენ.

მაშასადამე, დიდი ცდუნება არსებობდა, თუ ნაციონალიზტური არა, ნაციონალური ხაზი მაინც აელო ქართველ სოციალ-დემოკრატიას, და აქედან კი ლოლიკური დასკვნაც მზად იყო: რუსული პარტიიდან გამოთიშვა, თავის პარტიის დაარსება. მან არა ჰქმნა არც ერთი, არც მეორე, აილო ინტერნაციონალური ხაზი და რუსულ პარტიაში დარჩა.

იყო კიდევ ერთი შესაძლებლობა — და ამაზე ვაქცევ მკითხველის განსაკუთრებულ ყურადღებას: ვაქცევა, ბრძოლის ველის მიტოვება! როგორ ვაქცევა, მიტოვება? მე ვლაპარაკობ ტფილისზე, რომელიც უღმობელ მტერს ხელში ჩაეგდო პოლიტიკურად, ხოლო ეკონომიურად სომხები ბატონობდენ და განაგებდენ მას, თანახმად პირველის დირექტივებისა. ქართველები რას წარმოადგენდენ ჩვენს დედა-ქალაქში, უკვე ვსთქვი. განა არ აჯობებდა ასეთ უმწეო პირობებში ასპარეზის დაცლა, ვაქცევა დასავლეთ საქართველოში: ქიათურა - ქუთაისში, ბათუმში, ფოთში!

დასვლების მუშაობის ცენტრად, როგორც ვიცი, მაინც ტფილისი იქცა, აქ იყო სოციალ - დემოკრატიის ტენი, და ყველა მისი ორგანიზაციების უმაღლესი ინსტანცია. ეს სასიქადულო ისტორიული ფაქტი, თუ გნებავთ, იდეოლოგიურად „დიამატს“ მიეწერებოდა: ეკონომიურ კონცენტრაციას და პოლიტიკურ ცენტრალიზაციას! ორივე ეს კვანძი ხომ საქართველოს დედა-ქალაქში ისკვნებოდა, აქ სწყდებოდა თვით ერის ყოფნა არ ყოფნის კითხვა — აი რას გრძნობდა ინსტიტუტურად ქართველი სოციალ-დემოკრატია.

უკანასკნელი მამაცად ჩაება, შეიძლება ითქვას, ამ ერ-

თობ უმადურ მუშაობაში, სადაც ქართველ მუშას არც პოლიტიკური მფარველი გააჩნდა, არც თავის ეროვნების მრევ-ველნი. პირიქით, რუსის ბიუროკრატია და სომხის პლუტოკრატია მას კრიჭაში უდგენ, უკან ხევდენ, სულაც ერეკებოდენ. შექმნილ ვითარებაში, ცხადია, ინტერნაციონალიზმი ერთად ერთი ხსნა იყო: ქართველი მუშა ბრძოლას კი არ უცხადებს რუს და სომეხ მუშას, არამედ ძმობას, სოლიდარობას, — ასე ჩააგონა მას სოციალ-დემოკრატიაში...

არ შეიძლება ითქვას, რომ სოციალ-დემოკრატიაში ბევრი მიმდევარი ჰყოვა არა-ქართველ მუშებში, მაგრამ აქაც იყო ერთგვარი გარჩევა. რუსის მუშას, როგორც პრივილეგიურს, თავის ერის სვე-ბდი არ ადარდებდა, უამისოდაც უდავო ბატონი იყო ის; ხოლო სოციალურად, თუ მაინც ბრძოლა უხდებოდა მას, სხვა გზა არ დარჩენოდა, გარდა სოციალ-დემოკრატიაში, იმპერიის საერთო პარტიაში ჩაწერისა, და აქ კი, ადგილობრივ, ქართველს ეჭირა სადავე. სომეხ მუშებს კი თავისი პარტია ჰყავდათ — ჰინჩაკისტების, — მაგრამ დაშნაკებიც — ესენი უძლიერესნი იყვნენ — ხომ სოციალისტებს ეძახდნენ თავის თავს და ერთგვარ ხიდად ედებოდნენ სომხის მუშებისა და კაპიტალისტების შუა. უკანასკნელნიც, ეროვნული მიკერძების დასაფარავად, მეტწილად კა-დეტების ქურქს ისხამდნენ.

ამ რიგად, ერთის მხრით, სოციალ-დემოკრატები თავისი ინტერნაციონალიზმით, მეორეს მხრით, დაშნაკები თავისი ნაციონალიზმით — აი ვინ ეჭიშპებოდა ბოლოს და ბოლოს ერთმანეთს შრომისა და კაპიტალის სარბიელზედ. დღეს უკვე აშკარაა ვინ გამოვიდა გამარჯვებული — ქართველი სოციალ-დემოკრატია. მაშ ინტერნაციონალიზმს გაუმარჯვებია — იტყვის მკითხველი. დიახ, გარეგნულად, ფორმალურად სწორედ ასეა, მაგრამ არსებითად?

ამ კითხვის გადასაჭრელად გადაშალეთ თებერვლის რევოლიუციის პირველი ფურცელი, სადაც, სხვათა შორის, ტფილისის მუნიციპალური არჩევნების ბიულეტენებს წაიკითხავთ: ხმოსანთა დიდი უმრავლესობა ქართველებია! გაუგონარი ამ-



ბავი: ნაძალადეგმა დაიპყრა სოლოლაკი და საქართველომ კი თავისი დედა-ქალაქი! რა დაერქმის ამ სწორუპოვარ საქმეს? **ეროვნული**, თავის თავად ცხადია.

მაგრამ, ცოტა არ იყოს, მე წინ ვაგუხსნარი ზოგიერთ მნიშვნელოვან თარიღებს, 1917 წლის ადრე. დასელების ინტერნაციონალური მიდგომა მიმდინარე აქტუალური კითხვებისადმი ნაკარნახევი იყო თვით მრავალ-ერიან კავკასიის მიერ. ეს მრავალ-ერიანობა, როგორც ცნობილია, უსაშინლესი მჭრელი იარაღი გამოდგა გაბატონებული რუსის ხელში და, უნდა ითქვას, ის მას დაუზარებლად, დაუნდობლად იმარჯვებდა. ამის ყველაზე უსაზარლესი შედეგი სომეხ - თათართა ურთიერთი ელეტა იყო, რითაც, სხვათა შორის, სისხლში იქნა ჩახრჩობილი პირველი რევოლიუცია ბაქოში. მაგრამ ბაქომ, ცოტა დააკლდა, რაღმე ტფილისიც არ ჩაითრია ამ ველურ ვაკეხანალიაში, და ის უთუოდ დატრიალდებოდა, თუ არა დასელების ენერგიული ჩარევა, თვით ელდა ნაცემ მეფის ნაცვლის თხოვნით! აქ მოხდა, თუ გნებავთ, პირველი საჯარო დემონსტრაცია სოციალ-დემოკრატიის აღზრდილ საქართველოს სოციალ-დემოკრატიის მორალური წონისა და მნიშვნელობის; ამ თარიღიდან იწყება მისი პოლიტიკური მესვეურობის საყოველთაო აღიარება... არა მარტო საქართველოში.

დასელებმა თავისი არალეგალური მუშაობა თავიდანვე საქართველოს გადაღმაც გააჩაღეს, სახელდობრ ბაქოს მიმართულებით. ეს ხაზი: ბაქო-ტფილისი-ბათუმი კავკასიის სოც. დემ. საოლქო კომიტეტის მნიშვნელოვან ღერძად იქცა, ხოლო ამ საერთო ორგანიზაციაში ტონის მიმცემი ქართველები იყვნენ. მარტო ეს გარემოებაც საკმაო ნათლად ხსნის საქართველოს სოციალ-დემოკრატიის ხელმძღვანელ როლს კავკასიაში, 1917 და შემდეგი წლებში.

აქ უადგილო არ იქნება გავიხსენოთ ჩვენი ისტორიკოსების მსჯელობა იმაზე, რომ საქართველოს უფრო შორსმჭვრეტი მეფენი, იზენდენ რა ტოლერანტობას, არა-ქართველთა მიმართ შიგნით, ცდილობდნენ თავისი გავლენა სამეფოს გარეთაც გაე-

ვრცელებინათო. მე ვფიქრობ, საქართველოს სოციალ-დემოკრატიაც, სულ ერთია რა მოტივით, იმავე ტრადიციას აგრძელებდა. კავკასიის გეოგრაფიული მდგომარეობა, მისი ეკონომიური მთლიანობა, მცხოვრებთა სიჭრელის გვერდით, და დიდი მიმზიდველობა უცხო დამპყრობისათვის დასაბამიდან ჩვენამდე ხომ ხალასი ფაქტია.

მაგრამ ქართველი სოციალ-დემოკრატიის „ექსპანსია“, თუ შეიძლება ასე ითქვას, გაცილებით უფრო შორს მტყორცნი გამოდგა, ვინემ ქართველი მეფეების! მე ხომ ვსთქვი ზევით, რომ ქართველი სოციალ-დემოკრატია რუსეთის ს. დ. პარტიის წევრი იყო და მის კანონებს ემორჩილებოდა მეთქი. ეხლა მე უნდა შევზღუდო ეს ფორმალური მხარეც: ქართველები უფრო სიტყვით, ვინემ საქმით ემორჩილებოდენ ცენტრს. არალეგალურ პირობებში უშუალო მორჩილებაზე ლაპარაკიც ზედმეტია, მით უფრო, დასელები მარტო სარდაფებში როდი იყვნენ გამომწყვდეული და ლეგალურ მუშაობასაც ეწეოდენ, სადაც და როგორადაც კი შესაძლებელი იყო. გაიხსენეთ, თუ გინდ მათი ყოველდღიური პრესა, რომელსაც საზღაპრო გველეშაპივით, ათასი თავი აღმოაჩნდა: ერთს რომ გააგდებინებდენ, უმალ მეორეს გამოიბამდა. რუსეთის საერთო ს. დ. პარტია ამას ძნელად ან სულ ვერ ახერხებდა.

მეტ ნაწილად სწორედ ამით აიხსნებოდა, მაგ., ის ფაქტი, რომ, როცა პირველი დუმის არჩევნები დაინიშნა, რუსეთის ს. დ. პარტია ბოიკოტით შეხვდა მას, ხოლო კავკასიის საოლქო კომიტეტმა მხურვალე მონაწილეობა მიიღო მასში. საერთო პარტიის გადაწყვეტილების ასე აშკარა და უკმეხი დარღვევა ერთ-ერთი ადგილობრივი ორგანიზაციის მერ, უკეთ არ შეიძლება ისე ახასიათებს მათ ურთიერთ დამოკიდებულებას. მაგრამ რაც მთავარია და დიდი მნიშვნელობის — ეს ქართველი დეპუტატების ლიდერობა ს.-დ. ფრაქციისა ოთხივე დუმაში, რაიცა რუსეთის ს. დ. პარტიის საარჩევნო ბოიკოტს მოჰყვა შედეგად!

მთელი იმპერიის სახელმწიფო დუმის ტრიბუნის ქართვე-

ლი სოციალ-დემოკრატების მიერ დაპყრობამ, იქვე გარეშეა, მთლად ყირამალაზე დააყენა „მორჩილების“ კითხვა: ეხლა ფრაქცია კი არ ემორჩილება პარტიას, არამედ წინაუქმო, პარტია - ფრაქციას! გარეგნულად, რა თქმა უნდა, დეკორიუმი დაცული იყო, პარტია არსებობდა, სწერდა რეზოლიუციებს, გზავნიდა თავის წარმომადგენელს ფრაქციაში, მაგრამ სად არალეგალური „ინსტრუქციები“ და სად ლეგალური გამოსვლები საიმპერიო ტრიბუნიდან, რომელიც ყოველ წუთს ახალ-ახალ შეფარდებას მოითხოვდა ცვალებად პირობებთან! პარტიის მოგზავნილნი ხელმძღვანელის ნაცვლად ფრაქციის ტექნიკურ სპეცებად იქცენ. და კიდევ ამიტომ, როცა აგორდა „მეცხრე ზვირთი“, პარტია არავის გახსენებია და მის ნაცვლად ფრაქცია, უკეთ — ქართველი დეპუტატები მოექცენ მის „ფარს“.

გავაკეთოთ ერთი მარტივი დასკვნა თქმულიდან: ეგნატე ნინოშვილის ფერფლზედ მორცხვად დანერგილი მესამე დასი, რალაც ოცდა სამი წლის განმავლობაში, დიდ პოლიტიკურ ძალად იქცა მთელს იმპერიაში, ხოლო კავკასიაში მის გავლენას არამც თუ არ ებრძოდენ, თავის ნებითა და სურვილით ექვემდებარებოდენ. როცა კავკასია დანაწილდა, გარეშე ძალთა მეოხებით, ვის შეუძლია უარყოს, რომ 118 წლის წინ მსოფლიო რუკიდან ამოშლილ საქართველოს ასე ჩქარა გაცნობა და ცნობა, პირველ რიგში, მისი სოციალ-დემოკრატის და დეპუტატების ამ გავლენას მიეწერებოდა?

მაგრამ მე ვიცი, მოპირდაპირენი ერთხელ კიდევ აგვიხიარდებიან: საქართველო, ქართული საქმე აბა რა შუაშია! ემსახურებოდით პროლეტარიატს, სოციალიზმს, ინტერნაციონალს, სადაც დამოუკიდებელი სექციაც არ გყავდათო.

მათ აღბათ თავშიც არ მოუვათ, რომ მე ერთი „კოზირი“ შემოვიინახე „საბოლოვოდ“, პირდაპირ გამანადგურებელი! თუ ოდესმე რომელსამე პატარა ერს, ნუ შეგვრცხვება ვსტქვათ, პატარა ერს მთელს „დუნიაზე“, ისე შეუბრალებლად, ისე საშინლად უყრია ჯავრი მის მჩაგვრელ დიდ ერზე, რო-

გორიც იყარა ქართველმა ერმა და მის წიაღიდან გამოსულმა მესამე დასმა რუსეთზე და მის უპირო, გაუტანელ რომანოვებზე, — მე მზადა ვარ „მამაპაპურად“ ვუბასუხო ჩვენს მოპირდაპირეთ : თქვენი ხმალი, ჩემი კისერი!

ამ კოზირს არ ხმარობენ, მართალია, თვით ისინი, ვისაც ის ხელში ეჭირა; ვერც იმის გარანტიას მოგცემთ, რომ საქართველოს სოციალ-დემოკრატიის მეთაურნი ასეთი შურისძიებით იყვნენ გაქლენთილნი, სულ წინააღმდეგ, იქნება! მით უარესი მათთვის, თუ შეუგნებლად, შეუტყვისებლად ჩაიღინეს ეს სასახელო საქმე.

მე ისტორიას არა ვსწერ, რასაკვირველია, მაგრამ რაცა ვსთქვი, ერთი კითხვის დასმის უფლებას მაინც მაძლევს, იმედია. ნუ თუ არ დადგა დრო იმისათვის, რომ საფუძვლიანი გადასინჯვა მოხდეს ძველი დავისა და დავიდარების ქართულ აზროვნებაში, გაიღოს ხიდი ომის, რევოლუციის, დამოუკიდებლობის წინ არსებულ მიმდინარეობათა შორის და ანცობილ იქნან ისინი ერთ ჯაჭვად, რომლის თვითეული რგოლი გაგრძელებაა მეორის, მესამის და ასე ბოლომდის? ქართული აზროვნების ზრდა-განვითარების მთლიანი ისტორია, რუსეთის მფლობელობის დაწყებიდან, ჯერ არავის დაუწერია, იყო ზოგიერთი ფრაგმენტული ცდები, ხოლო სოც. დემ. იდეური მიმდინარეობის ადგილი ამ აზროვნებაში, თუ სტალინის ყმების ნაჯღაბნს სათვალავში არ მივიღებთ, ჯერ არავის უჩვენებია.

აბა მიხვდით ვინ წამოისროლა ფრაზა: რამდენი ნულიც არ აკოწიწოთ ერთმანეთზე, თუ მათ წინ სულ მცირე ციფრი არ დასვით, მაინც ნულებად დარჩებიან! განმარტება ზედმეტია, ვინ იგულისხმებიან ნულეებში: მასები, ხალხი... მაგრამ მეორე ბანაკიდანაც აი რა გაისმოდა: ერთი საქართველო, ერთი ქართველი ერი არ არსებობს, ორადაა გაკობილი, ამაოა გამრთელება! აქ იგულისხმობდა კლასთა ბრძოლა... როგორაა ამ მხრივ ეხლა საქმე? ხალხი სცენაზე გამოვიდა, იქცა მონოლიტურ ერად, ნაციად. მაშ თავის თავად მომხდარა სინტეზი, შერიგება... და ეს აზროვნებაშიც კპოვებდა თავის განსახიერებას, ვერაგ მტერს პირზე კლიტე რომ არ დაედო ერისათვის.

რა არის მრი?

მე განვსაზღვრე წინეთ რა არის სახელმწიფო, ეხლა ვცდი განვსაზღვრო რა არის ერი.

ერი არის ერთისა და იმავე ტომის, ენის, თავგადასავალის, ხასიათის მქონე ადამიანთა ისეთი შეერთება განსაზღვრულ ტერიტორიაზედ, რომელსაც თავის თავი ერთარსებად, ერთობილად შეუცვნიდა და აქვს სურვილი ერთად იცხოვროს და ნებისყოფაც თვითონვე გაუძღვეს თავის საქმეებს.

ამ განსაზღვრიდან მეორე ნახევარი: თვითშეცნობა, ნებისყოფა სახელმწიფოებრივი ცხოვრების ძალიან დიდი მანძილის ევოლიუციის ნაყოფია და წარმოადგენს უმაღლეს დინამიკურ ძალას. სახელმწიფოს არ აინტერესებს უშუალოდ ერთიგივობა ტომით, ენით, თავგადასავალით, ხასიათით, თუმცა ეს ნიშნები, ცხადია, დიდ როლს თამაშობდა მის წარმოშობა-განვითარების პროცესში. სახელმწიფოსთვის გადამწყვეტი მომენტი ხლისუფლებათა, ძალა, რომელიც ერთად იჭერს, იკავებს ადამიანთა ამა თუ იმ რაოდენობას განსაზღვრულ ტერიტორიის ფარგლებში და წარმართავს მათ განსაკუთრებული მიზნებისაკენ.

ხელისუფლებას ეფარდება ეროვნული ნებისყოფა და ეს კი სწორედ ერთიგივობას ემყარება ტომით, ენით, თავგადასავალით, ხასიათით. ეს ნიშნები, შეიძლება, საუკუნოები არსებობდეს, მაგრამ მათი მატარებელი ადამიანები არ გრძნობდენ თავს ერთარსებად, არ გამოხატავდენ ეროვნულ ნებისყოფას. ამ ხარისხამდე მიღწევისათვის ისინი გაივლიან სახელმწიფოს ჯადრაკში.



ეროვნულ თვითშეცნობას წინ უძღვის მოქალაქობრივი თვითშეცნობა და ეს კი მხოლოდ სახელმწიფოებრივი ცხოვრების ნაყოფია. ადამიანი ჯერ თავისუფალ მოქალაქედ უნდა იქცეს, ალიკურვოს უცილო უფლებით თვითონ განაგოს საქვეყნო საქმეები, რომ შეურიგდეს სახელმწიფოს, იწამოს ის თავისად და არა მის გარედ არსებულ უსულო მჩაგვრელ მექანიზმად. მხოლოდ მაშინ წარმოუდგება სახელმწიფო ადამიანს, როგორც სამშობლო, და თავს მის შვილად აღიარებს. ამ წუთიდან საქმე გვაქვს არა ძალდატანებით, მექანიკურ, ან მარტო უფლებრივ, არამედ ორგანიულ, ნებაყოფლობით და მორალურ შეერთებასთან, რომლის სახელია ერი, ნაცია.

ეს პროცესი სახელმწიფოს ერად, ნაციად გარდაქმნისა მარტივია და უმტკინველო, შედარებით, ერთი ეროვნების სახელმწიფოში, მაგრამ გაცილებით უფრო რთულია ის და მტკინველი, როცა საქმე გვაქვს ისეთ სახელმწიფოსთან, სადაც ერთი ერი ბატონობს ბევრ სხვა ეროვნებაზე, რომელთაც ან ჰქონდათ ოდესმე თავისი სახელმწიფო, ან სულაც არ ჰქონდათ იგი. ყოველ შემთხვევაში, შედეგი იგივეა: ეროვნებანი თავს აღწევენ გაბატონებულის უღელს, აარსებენ თავის სახელმწიფოს, გარდიქმნიებიან ერად, ნაციად. თუ არის თითო-ოროლა შემთხვევაც, როცა ეროვნება ვერ იქცა ერად, ნაციად, ეს კიდევ არ ნიშნავს, რომ ის არ იბრძოლებს ამისათვის, და თუ არ იბრძოლა, ვაი მას — ის უკვე გათქვეფილა გაბატონებულ ერში, დაუკარგავს თავისი სახეობა, გამქრალა, როგორც ეროვნება.

ამ რიგად, დამოკიდებულება მოქალაქესა და პატრიოტს შორის იგეთივეა, როგორიც სახელმწიფოსა და ერს შორის. არ შეიძლება კარგი პატრიოტი იყო, თუ იმავე დროს კარგი მოქალაქე არა ხარ; ეროვნებაც ხომ არ ერობს თუ ის სახელმწიფოდ არ იქცა. ეგ არის გარდაუვალი სოციოლოგიური კანონი, თუ ასეთი რამ არსებობს საზოგადოდ.

იზადება კითხვა, არის კიდევ რამე განსხვავება სახელმწიფოსა და ერს შორის? განა არაა დრო, ზევით თქმულის შემ-



დევ, მათ შორის ერთიგვიობის ხაზი გავუსვით? ერთი ნაცია, მართლაც, როგორც ყველაზე ბუნებრივი, სალი და ცხოველი შეერთება, დასრულებული სახელმწიფოა, თითქო მის ადგილს იჭერს ამიერიდან. თუ სახელმწიფოს მთლიანობის დუღაბი ძალდატანება დასაწყისში და უფლებრივობა შემდეგ, ერის მთლიანობა მის შვილთა ნებაყოფლებით მორალურ კავშირს ემყარება. განა გაგიგონიათ ოდესმე ეგრედ წოდებული ირედენტა ერთი ეროვნების სახელმწიფოში, მისი შვილნი განზე რომ იხედებოდენ, სხვა ეროვნების სახელმწიფოზე მიწერას ლამობდენ? მე ხომ სულით მახინჯებზე, ვსთქვამთ, ჩვენი არამზადებზე არ ვლაპარაკობ! არც ეროვნულ უმცირესობას ვეხები, რომელიც ცდილობს მიეწეროს, თუ მოსაზღვრეა, მეზობელ დედა-ერს; თუ არა, მიაღწიოს კულტურულ-ეროვნულ განვითარების უზრუნველყოფას სხვა ეროვნების სახელმწიფოში.

არა, სახელმწიფოს ისტორიული მისხია ჯერ არ არის დამთავრებული. სახელმწიფოს ერად, ნაციად გარდაქმნა მოასწავებს ძალდატანებითი და უფლებრივი კავშირის ნებაყოფილებით და მორალურ კავშირად გარდაქმნას. ხოლო თანამედროვე ცხოვრების საფეხური ჯერ კიდევ არაა და დიდ ხანს არ იქნება ისე მაღალი, რომ მარტო მორალს დაემყარო. პირიქით, უფლება და ძალდატანება აუცილებელი ბერკეტია ქვეყნის საქმეთა წარსამართავად. მარტო არსებული სოციალ - ეკონომიური ანტაგონიზმი, სხვაც რომ არ დაეასახელო, მსაჯულისა და პოლიციის ჩარევას გარდაუვალად ხდის.

მაგრამ ამით იდეალი: ერის მორალურ ერთარსებად, ერთობილად ქცევა არა თუ არ იბღალემა, კიდევ უფრო დიად მისასწრაფავ საგნად ხდება აწმყოსა და მომავალში. დაეუშვათ, იდეალი მიღწეულია: მსუჯული და პოლიცია ზედმეტი ვახდა, საკმარისია მორალური იმპერატივი, რომ ყველამა და თვითთულმა თავისი მოვალეობა პირნათლად მოიხადოს ქვეყნისა და ერის წინაშე. განა ჰქრება ამით სახელმწიფოებრივობის ყოველი ნასახი? არა, ჩემის აზრით, წესი ერთად ცხოვრებისა, თანამშრომლობისა, სოციალურ, ოჯახურ, ინდივიდუალ-



ლურ და სხვ. დამოკიდებულებისა მაინც უნდა იქნეს ვისმეს გან დადგენილი და მის ასრულების მეთვალყურე ორგანოებიც შექმნილი.


ერმა შეწრუპა სახელმწიფო, მასზე გადავიდა ხელმწიფე-ბა, უზენაესობა. ერი ჰქმნის მორალურ იმპერატივებსაც, წე-სებს, მაგრამ ის უკვე არ არის მრისხანე იუპიტერი, არამედ მისი ტვინიდან გამოფრენილი მინერვა, სიბრძნისა და ხელოვნების ღმერთი, რომლის ბრძანება გვავალებს და არ გვაიძუ-ლებს, რადგან ასრულება თვით ჩვენი მოთხოვნილობა, მორა-ლი... რადგან იუპიტერიცა და მინერვაც ჩვენ თვითონ შეექმე-ნით, ჩვენს გარეშე ისინი საპნის ბუშტია!

კანტმა სთქვა თითქმის ორი საუკუნის წინ: ისე მოეპყა-რი მოყვას, როგორც შენ გინდა, რომ ის მოგეპყრას შენ თვი-თონ. ეს საზომი საფუძველია ადამიანის უფლებისა და ხელუხ-ლებლობის, სამართლიანობის. თავისუფლებაც, როგორც ყვე-ლაფერი ამ ქვეყნად, რელატიურია რამაა: თავისუფალი ხარ იმდენად, რამდენად შენი თავისუფლება არ ზღუდავს სხვების თავისუფლებას.

ასევე ითქმის ერზე, ისიც ხომ ორგანიზმად, სუბიექტად გვესახება. მაშასადამე, მისი უფლება და თავისუფლება იგე-თივე ხელშეუხებელი წმიდათა - წმიდაა, როგორიც ცალკე ადამიანის. აქედან, დამოკიდებულება ერთა შორის, თავისუ-ფლება თვითუფლის დანარჩენთა მიმართ იმავე ადამიანთა ურთიერთ დამოკიდებულებას იღებს სანიმუშოდ.

საგულისხმიეროა, სახელმწიფოთა ურთიერთ დამოკიდე-ბულებას თავიდანვე საერთაშორისო დაერქვა, და ეს უკვე გვი-ჩვენებს გზას, რომელიც უნდა გაიარონ თავისუფალმა ერებმა. დღეს-დღეობით სახელმწიფონი და არა ერნი ჰქმნიან უფლებას და უკანასკნელს კი ძალმომრეობა, ომი უდევს საფუძვლად. არ არსებობს საერთაშორისო ორგანოც, რომლის წინაშე ქედს უნდა იხრიდნენ დიდი და პატარა ერები.

არსებული ერთა ლიგა ნამდვილად სახელმწიფოთა ლი-გაა და ისიც არა უნივერსალური, რადგან ბევრი სახელმწიფო



არ შედის მასში. მართალია, მას დიდ და პატარა ერთა თანასწორობა დაედო საფუძვლად, მგრამ სინამდვილეში შორენი პირველთა კარნახს ექვემდებარებიან.

ეს წინააღმდეგობა ბუნებრივია, თუ მივიღებთ მხედველობაში, რომ სახელმწიფოთა ძალთა უთანასწორობაზედ არიან აგებულნი. ეს უთანასწორობა რომ გააჭკრეს, საჭიროა სახელმწიფო ერმა შესცვალოს, ძალა უფლებამა და სამართლიანობამ.

ფიზიკური თანასწორობა ბუნებაში არ არსებობს, შეიძლება მხოლოდ **მორალური** თანასწორობა და ემყარება იგი არა იმდენად უფლებას, რამდენად **სამართლიანობას**. სამართლიანობის შეცნობა და განსახიერება მხოლოდ ადამიანს შეუძლია, ხოლო ერი, დიდია თუ პატარა, ადამიანთა კრებულიაგან შესდგება. ამიტომ ერთა და არა სახელმწიფოთა ლიგას შეუძლია თანასწორობა სიტყვიდან საქმედ აქციოს.

და მაშინ, მხოლოდ მაშინ შეიძლება მთელს კაცობრიობას თავისუფალ ერთა ჰარმონიული ოჯახი დაეძახოს, და მით მის მიერ შემოღებული წესები საერთაშორისო განწყობილებათა ურყევ კანონად იქცეს.

ს ა რ ჩ ე ვ ი :

აეტიორისაგან	5—7
I. სახელმწიფო	
ხელისუფლება	გვ. 9—18
ცოტა რამ ისტორიიდან	19—26
II. ე რ ი	
სახელმწიფო — ერი	27—32
ერი — სახელმწიფო	33—40
ჩვენი წარსულიდან	41—47
ბალხი სცენაზედ	48—61
რა არის ერი ?	62—66

ფასი 5 ფრანკი

F21.821
2E
34400000
4020000000

დ. ხელაძის გამოცემა.